

RS8 - Tryloywder ac Atebolrwydd

(Fersiwn Mehefin 2004)

	Page
Rhagair	1
Crynodeb gweithredol	2
Arolwg o agweddau'r cyhoedd	3
Proffil o'r elusennau a gynhwyswyd yn y sampl	4
Adrodd am ddatgeliadau gofynnol	4
Adrodd am ddatgeliadau o arfer gorau	5
Adolygiadau blynyddol	6
Canfyddiadau yn ôl math o elusen	6
Barn y Comisiwn Elusennau	7
Dulliau cyfathrebu	9
Adroddiad Blynyddol a Chyfrifon	10
Arddull a chyflwyniad Adroddiadau Blynyddol ac Adolygiadau Blynyddol	12
Gwefannau	15
Datganiadau am yr hyn y mae'r elusen yn ceisio ei wneud	17
Amcanion elusennol	17
Statws elusennol	17
Categoriadau elusennau	18
Mewnbwn	20
Pobl	20
Eiddo	21
Cyllid ac incwm	21
Gweithgareddau a chyflawniadau	25
Gwariant	26
Effaith	27
Cyflawniadau yn erbyn targedau	27
Strwythur a phrosesau cyfundrefnol	30
Manylion am ymddiriedolwyr a phwyllgorau	30
Strwythur cyfundrefnol	31
Datgelu strategaeth, polisiau a chynlluniau	34
Strategaeth a chynlluniau	34
Polisiau	35
Atodiad A - Technegau ymchwil a chanfyddiadau arolygon	39
Atodiad B - Rhestr termau	50
Atodiad C - Gofynion ar gyfer paratoi a ffeilio Adroddiadau Blynyddol a Chyfrifon	52
Atodiad D - Llyfryddiaeth	54
Cydnabyddiaethau	55

Mae elusennau yn chwarae rhan gyfoethog ac amrywiol yn y gymdeithas fodern ond mae parhad eu llwyddiant yn dibynnu ar ymddiriedaeth a hyder y cyhoedd yn eu gwaith. Mae adroddiad yr Uned Strategaeth (SU), *Private Action, Public Benefit* yn cydnabod hyn, ac yn eu hymateb i'r adroddiad, nododd y llywodraeth fod "... mynediad rhwydd i wybodaeth fanwl gywir a pherthnasol am elusennau yn hanfodol er mwyn sicrhau atebolrwydd, a chreu ymddiriedaeth a hyder mewn elusennau."¹ Mae nifer o argymhellion y SU yn effeithio'n uniongyrchol ar dryloywder ac atebolrwydd elusennau. Ar hyn o bryd, mewn ymgynghoriad â'r sector, treialir un o'r argymhellion hyn, sef yr argymhelliad y dylai'r elusennau mwy o faint gwblhau Ffurflen Gwybodaeth Safonol flynyddol (SIR) yn nodi eu gwaith, eu cyflawniadau a'u heffaith. Mae argymhelliad arall, a gynhwysir yn y drafft o'r Mesur elusennau, yn rhoi amcan statudol penodol i'r Comisiwn Elusennau i sicrhau bod elusennau yn fwy atebol i gyfranwyr, buddiolwyr a'r cyhoedd. Bydd y newidiadau hyn, ynghyd â datblygiad Guidestar-UK (porth gwybodaeth newydd sy'n arddangos gwybodaeth o Adroddiadau Blynyddol a Chyfrifon elusennau, ynghyd â deunydd atodol) yn helpu i gynyddu swm yr wybodaeth fydd ar gael i fudd-ddeiliaid ac felly yn cynyddu atebolrwydd elusennau.

Yn ôl dehongliad y Comisiwn Elusennau mae tryloywder ac atebolrwydd yn golygu darparu gwybodaeth berthnasol a dibynadwy i fudd-ddeiliaid mewn modd

sy'n ddiuedd, yn gymaradwy, yn ddealladwy ac sy'n canolbwyntio ar anghenion budd-ddeiliaid. Mae'r adroddiad hwn yn bwrw golwg ar yr hyn y mae pobl yn ei ystyried yn bwysig yn y maes hwn ac yn archwilio lefel y tryloywder ac atebolrwydd a geir yn adroddiadau elusennau.

Yr ydym o'r farn bod cydymffurfio â'r Datganiad o Arferion Cymeradwy (SORP Elusennau) yn ofynnol er mwyn dangos atebolrwydd, yn enwedig yn achos yr elusennau mwy. Bydd adolygiad y SORP sydd ar y gweill ar hyn o bryd yn creu ffocws ar gyfer adroddiadau llawnach gan elusennau ynglŷn â'u hamcanion, eu cyflawniadau, eu canlyniadau a'u heffaith.

Mae'r adroddiad hwn yn cyflwyno canfyddiadau dadansoddiad o'r wybodaeth a ddarparwyd yn Adroddiadau Blynyddol a Chyfrifon ac Adolygiadau Blynyddol 200 o'r elusennau mwyaf. Ni chynhaliwyd y dadansoddiad er mwyn asesu i ba raddau y mae'r sector yn cydymffurfio â'r SORP. Yn hytrach, aeth ati i asesu i ba raddau yr aeth yr elusennau a ddewiswyd ar gyfer y sampl y tu hwnt i'r gofyniadau lleiaf er mwyn darparu gwybodaeth lawn ac eglur am eu perfformiad yn ystod y flwyddyn.



John Stoker
Prif Gomisiynydd Elusennau

¹ Uned Strategaeth, *Private Action, Public Benefit - a review of Charities and the wider not-for-profit sector*, Swyddfa'r Cabinet, 2002.

Crynodeb gweithredol

Y mae'r Comisiwn Elusennau o'r farn bod atebolrwydd yn dystiolaeth o ymateb elusen i anghenion gwybodaeth ei budd-ddeiliaid. Mae'n bwysig bod y sawl sydd â diddordeb yn gallu cael gafael yn rhwydd ar wybodaeth berthnasol a dibynadwy am safle a pherfformiad ariannol elusen, y defnydd a wneir o'u hadnoddau, eu strwythur cyfundrefnol, polisiau, blaenoriaethau, gweithgareddau a'u cyflawniadau.

Mae lefel uchel o dryloywder wrth adrodd am berfformiad yn caniatáu i ymddiriedolwyr:

- ddangos bod adnoddau yn cael eu defnyddio'n ddoeth ac at y diben penodedig;
- ddangos bod yr elusen yn cael ei threfnu a'i rheoli'n briodol;
- ddangos bod yr elusen yn gweithredu'n effeithlon ac yn effeithiol; ac
- Ddenu adnoddau newydd er mwyn caniatáu i'r elusen barhau â'i gweithgareddau.

Mae'r Comisiwn Elusennau yn un o blith nifer o fudd-ddeiliaid gyda diddordeb yn y ffordd y bydd elusennau yn gwneud defnydd o'u hadnoddau, ac mae'r Adroddiad Blynyddol a Chyfrifon yn un o nifer o ddulliau y bydd elusennau yn eu defnyddio i gyfathrebu â'u budd-ddeiliaid. Er hynny, dylai'r Adroddiad Blynyddol a Chyfrifon ddarparu digon o wybodaeth i alluogi budd-ddeiliaid i asesu perfformiad cyffredinol elusen, gan gynnwys cyfeiriadau at ffynonellau manylion ychwanegol.

Er mwyn mesur i ba raddau y dilynir arfer gorau o ran tryloywder ac atebolrwydd ymhlith yr elusennau mwyaf yn y sector, cynhaliodd y Comisiwn Elusennau

ddadansoddiad gwrthrychol o Adroddiadau Blynyddol a Chyfrifon sampl yn cynnwys 200 o'r elusennau mwyaf, ynghyd ag astudiaeth o'u Hadolygiadau Blynyddol a'u gwefannau. Ni wnaed hyn er mwyn asesu i ba raddau y mae'r sector yn cydymffurfio â'r SORP; ystyriai bod cydymffurfiaid â'r SORP yn dystiolaeth o'r lleiafswm gofynnol o ran atebolrwydd ac aeth ymhellach i brofi i ba raddau y mae'r elusennau yn dryloyw wrth gyfrif am eu perfformiad. O ganlyniad, roedd hygyrchedd yr wybodaeth a gynhwysir yn yr Adroddiadau Blynyddol a Chyfrifon, Adolygiadau Blynyddol a'r gwefannau yn nodwedd allweddol o'r dadansoddiad. Ceir hyd i ganfyddiadau manwl y dadansoddiad ym mhrif gorff yr adroddiad hwn.²

Archwiliwyd Adroddiadau Blynyddol a Chyfrifon yr elusennau, ynghyd â'r Adolygiadau Blynyddol pan oeddent ar gael, gan gyfeirio at nifer o feini prawf:

- Cydymffurfiaid â gofynion SORP a rheoliadau Elusennau, mewn perthynas yn bennaf ag Adroddiadau Blynyddol a'r SORP paragraff 31.
- Darpariaeth gwybodaeth ychwanegol o fewn Adroddiadau Blynyddol er mwyn hybu dealltwriaeth o strwythur, gweithgareddau, cyflawniadau a chanlyniadau'r elusennau.
- Swm, tryloywder a phrydlondeb yr wybodaeth sydd ar gael i fudd-ddeiliaid yn yr Adroddiadau Blynyddol a Chyfrifon, Adolygiadau Blynyddol a'r gwefannau, i'w helpu i asesu effeithiolrwydd a pherfformiad elusen.
- Hygyrchedd gwybodaeth er mwyn caniatáu cymariaethau ystyrllon rhwng elusennau o'r un fath.

² Yn ogystal, edrychwyd yn fanwl ar gyfres o gymarebau ariannol allweddol, a bydd y rhain yn ffurfio ffocws ail adroddiad a gyhoeddir yn ddiweddarach eleni.

Canolbwyntiodd ein dadansoddiad ar dri mater allweddol yn ymwneud â thryloywder ac atebolrwydd:


- Math a swm yr wybodaeth a ddarparwyd.
- Lleoliad yr wybodaeth.
- Prydlondeb yr wybodaeth.

Arolwg o agweddau'r cyhoedd

Aethom ati i gomisiynu arolwg ffôn annibynnol, gan dargedu 1,000 o bobl er mwyn cael eu barn ar yr wybodaeth a ryddheir gan elusennau. Mae'r canlyniadau yn dangos bod egwyddorion tryloywder ac atebolrwydd yn bwysig ym marn y cyhoedd.³

Mae'r graff canlynol yn dangos canran yr atebwyr a ystyriai ei bod yn bwysig neu'n bwysig iawn bod elusennau yn rhyddhau gwybodaeth yn ymwneud â nifer o feysydd:

Canran yr atebwyr a ystyriai ei bod yn 'bwysig' neu'n 'bwysig iawn' bod elusennau yn rhyddhau gwybodaeth yn dangos:



³ Ceir hyd i fanylion am fethodoleg yr arolwg yn Atodiad A.

Proffil o'r elusennau a gynhwyswyd yn y sampl

Mae'r canlyniadau yn dangos mai'r meysydd gweithgaredd y gwariodd yr elusennau eu harian arnynt oedd yr ystyriaeth bwysicaf, ym marn atebwyr, a rhif cofrestru'r elusen oedd yr wybodaeth leiaf pwysig. Mae sgorau cymedrig yn dangos y dylai elusennau ddarparu gwybodaeth am bob maes a nodir yn yr arolwg, ym marn yr atebwyr.⁴

Yn ôl 60% o atebwyr, byddai'r gallu i gymharu gwybodaeth bwysig am yr elusennau yn dylanwadu ar eu penderfyniad ynglŷn â pha elusen i'w chefnogi. Roedd 35% o'r farn na fyddai'r wybodaeth yn dylanwadu ar eu dewisiadau. Defnyddiai atebwyr wahanol ffynonellau i ddysgu am elusennau. Defnyddiwyd y cyfryngau gan amlaf: 60% o atebwyr. Defnyddiai'r mwyafrif o atebwyr fwy nag un ffynhonnell.

Daeth blwyddyn ariannol y 200 elusen a ddewiswyd ar gyfer yr astudiaeth hon i ben ar 31 Mawrth 2003. £7.2bn oedd cyfanswm gwerth eu hadnoddau yn dyfod i mewn (tua 22% o incwm y sector) a £7.0bn oedd cyfanswm gwerth eu hadnoddau yn mynd allan ar gyfer y flwyddyn honno. Ar ddiwedd y flwyddyn, roedd cyfanswm eu cyllidau (ac eithrio gwaddolion) yn £5.9bn a chyfanswm eu cronfeydd rhydd yn £0.9bn.

Incwm o fasnach a grantiau a ffioedd gan lywodraeth ganolog a lleol oedd prif ffynonellau incwm bron 75% o elusennau'r arolwg. Roedd 87% yn gwario'r swm mwyaf o arian ar ddarparu gwasanaethau ar gyfer buddiolwyr, darparu grantiau a chymorth ariannol, a darparu adeiladau, cyfleusterau a llecyn agored.

Adrodd am ddatgeliadau gofynnol

Mae'r meysydd atebolrwydd canlynol yn ofynnol gan SORP Elusennau ac fe'u cwmpaswyd mewn manylder gan fwy na hanner y sampl. Cafwyd hyd iddynt yn rhwydd yn eu Hadroddiadau Blynyddol. Ymdriniwyd â'r datgeliadau hyn i'r safon uchaf gan y grŵp sampl.

Datgeliad	Nifer yr elusennau a ddarparodd manylion trylwyr a hygyrch
Rhestr o ymddiriedolwyr ar ddiwedd y flwyddyn ac a wasanaethodd yn ystod y flwyddyn	188
Datganiad o amcanion statudol yr elusen	161
Esboniad o nodau a bwriad yr elusen	152
Datganiad ynglŷn ag adolygu risgiau	147
Esboniad o bolisi cronfeydd wrth gefn yr elusen	131
Cyflawniadau yn ystod y flwyddyn	126

⁴ Gweler Tabl 25, Atodiad A

Crynodeb gweithredol

Fynychaf, nodwyd *diffyg manylion* o fewn Adroddiadau Blynyddol elusennau mewn perthynas â'r datgeliadau gofynnol canlynol. Mae'r rhain yn dangos y meysydd hynny lle cafwyd y perfformiad gwaethaf gan yr elusennau.

Datgeliad	Nifer yr elusennau na ddarparodd fanylion
Crynodeb o bwerau buddsoddi penodol	106
Esboniad o bolisiâu rhoi grantiau	97
Sylwadau am berfformiad buddsoddiadau	95
Adroddiad yn ymwneud â chyfraniad gwirfoddolwyr	82

Adrodd am ddatgeliadau o arfer gorau

Er nad oedd hynny'n ofynnol gan SORP Elusennau, darparodd yr elusennau'r datgeliadau o *arfer gorau* canlynol *mewn manylder* ac mewn modd *hygyrch*. Mae'r rhain yn dangos y meysydd hynny lle cafwyd hyd i fwy o wybodaeth na'r disgwyl yn Adroddiadau Blynyddol yr elusennau.

Datgeliad	Nifer yr elusennau a ddarparodd gwybodaeth fanwl a hygyrch
Esboniad o'r modd y rheolwyd risgiau	95
Darpariaeth o gymarebau defnyddiol	72
Sylw ar brif ffynonellau incwm a gwariant	71

Adolygiadau Blynyddol

Nid oes unrhyw ofyniad i gynhyrchu Adolygiadau Blynyddol ac ni chânt eu harchwilio na'u gwirio am eu cysondeb. Cynhyrchir Adolygiad Blynyddol yn ogystal ag Adroddiad Blynyddol a Chyfrifon gan 121 o'r 200 elusen a gymerodd ran yn yr arolwg. O blith y rhain, roedd 83 ar gael at ddefnydd yr arolwg.

Roedd arddull, ffurf a chynnwys yr Adolygiadau hyn yn llawer mwy deniadol a chyfeillgar i'r defnyddiwr na'r Adroddiadau Blynyddol. I bob golwg, prif bwrpas y mwyafrif o'r Adolygiadau oedd rhoi cyhoeddusrwydd cyffredinol i'r elusen. Yn ddi-os, roedd cyfran sylweddol ohonynt yn ceisio helpu i godi arian, ac i bob golwg cynlluniwyd rhai ohonynt fel ategiad i'r Adroddiad Blynyddol.

Yn achos nifer sylweddol o elusennau, gwnaed yn iawn am safon isel y datgeliadau o wybodaeth ofynnol yn yr Adroddiad Blynyddol (yn enwedig mewn perthynas â gweithgareddau, cyflawniadau a chanlyniadau) gan gyflwyniad y manylion hyn yn yr Adolygiad Blynyddol. Er mai peth da yw darparu'r wybodaeth hon, ni chaniateir defnyddio Adolygiadau Blynyddol yn lle Adroddiadau Blynyddol.

Canfyddiadau yn ôl math o elusen

Gosodwyd elusennau mewn categorïau yn ôl gweithgaredd, prif ffynhonnell incwm a phrif fath o wariant. Yna ceisiwyd dadansoddi i weld a oedd gan wahanol grwpiau wahanol lefelau o dryloywder ac atebolrwydd neu wahanol gryfderau/wendidau.

Roedd elusennau o'r mathau canlynol yn llawer mwy tebygol o gwrdd â neu ragori ar yr isafswm safonau derbyniol:

- Tueddai'r 12 elusen sy'n Gweithio Dramor yn bennaf i ddarparu gwybodaeth o well safon na'r cyffredin yn y mwyafrif o feysydd. Yn ogystal, nid oedd arnynt angen cymaint o amser i gyflwyno eu Hadroddiadau a'u Cyfrifon i'r Comisiwn Elusennau.
- Ar y cyfan, roedd y 44 elusen a weithiai ym meysydd Gwasanaethau a Chymorth Cymdeithasol yn well na'r cyffredin am gynnwys yr wybodaeth ofynnol yn yr Adroddiad Blynyddol, yn enwedig wrth esbonio eu heffaith a chanlyniadau eu gwaith.
- Tueddai'r 39 elusen a dderbyniai eu prif ffynonellau incwm o Roddion a Chymynroddion i gynhyrchu Adroddiadau Blynyddol a Chyfrifon ac Adroddiadau Blynyddol deniadol yr olwg gan groesgyfeirio o'r Adroddiad Blynyddol i'r gwefan. Yn ogystal, ar gyfartaledd roeddent yn well am esbonio canlyniadau eu gwaith a'u heffaith yn eu Hadroddiadau Blynyddol.

Roedd y mathau canlynol o elusennau yn llawer llai tebygol o gwrdd â neu ragori ar y gofyniadau lleiaf:

- Roedd yr 20 elusen a weithiai ym myd Diwylliant, Chwaraeon a Hamdden yn arafach na'r cyffredin am gyflwyno eu Hadroddiadau Blynyddol a Chyfrifon i'r Comisiwn Elusennau, yn waeth am

ddarparu'r wybodaeth ofynnol yn eu Hadroddiadau Blynyddol ynghylch eu gweithgareddau ac yn waeth am esbonio eu cyfraniad i'r gymdeithas yn gyffredinol a'r modd yr oedd eu cyflawniadau yn cymharu â'u cynlluniau. Mae gan y grŵp hwn gronfeydd rhydd isel iawn, ac eto roedd eu hesboniadau o'u polisiau cronfeydd wrth gefn hefyd yn waeth na'r cyffredin.

- Roedd y 41 elusen Iechyd a materion Meddygol ar y cyfan yn waeth na'r cyffredin am wneud y datgeliadau gofynnol yn yr Adroddiad Blynyddol.
- Roedd yr elusennau yn ymwneud â Thai a Materion Cymunedol, 16 o'r 28 ohonynt yn dilyn argymhellion SORP Landlordiaid Cymdeithasol Cofrestredig (RSL), yn waeth na'r cyffredin am wneud datgeliadau yn yr Adroddiad Blynyddol, yn enwedig wrth esbonio eu polisiau a'u pwerau cronfeydd a buddsoddi. Yn ogystal, roedd yr elusennau hyn yn waeth na'r cyffredin am esbonio canlyniadau eu gwaith a'u heffaith yn eu Hadroddiadau Blynyddol.
- Dibynnai 73 elusen ar arian gan y llywodraeth (ganolog a lleol) yn bennaf am eu prif ffynhonnell incwm. Yn gyffredinol, roedd lefel eu datganiadau yn is na'r cyffredin, yn enwedig o ran darparu polisiau cyfrifo digonol a nodiadau gyda'r Cyfrifon.

- Roedd y 39 elusen sy'n darparu Cyfleusterau yn bennaf yn waeth na'r cyffredin am gydymffurfio â gofynion SORP Elusennau mewn perthynas â'r Adroddiad Blynyddol, yn enwedig wrth drafod cronfeydd wrth gefn, buddsoddiadau a rheoli risgiau.

Barn y Comisiwn Elusennau

Mae tryloywder adroddiadau yn gynyddol bwysig ym maes rheoli elusennau. Mae cyrff sy'n cyllido a'r cyhoedd yn gyffredinol yn mynnu tystiolaeth sy'n dangos stiwardiaeth effeithlon o'r cyllid a roddant i'r elusen, ac mae'r Comisiwn Elusennau yn mynnu'r un peth. Mae ein canfyddiadau yn ategu'r ymdeimlad cyffredinol ymhlith sylwebwyr y sector bod lle i wella lefel y tryloywder ac atebolrwydd.

Y mae ein mentrau parhaus, a gynlluniwyd i wella lefel y tryloywder ac atebolrwydd, yn cynnwys:

- Monitro Adroddiadau Blynyddol a Chyfrifon ac Adolygiadau Blynyddol yn rheolaidd, a chyhoeddi enwau'r elusennau hynny sy'n parhau i fethu â chyflwyno eu hadroddiadau yn brydlon. Bydd y Comisiwn Elusennau yn ystyried cymryd camau i gadw trefn ar elusennau sy'n methu ag ymgymryd â'u cyfrifoldebau drwy gyflwyno eu dogfennau statudol.

- Yr ymgyrch 'Nid mater o ddewis yw Cyfrifon', sy'n ceisio tynnu sylw at bwysigrwydd hanfodol prydlondeb, cywirdeb a manylder wrth gyflwyno cyfrifon drwy dargedu cyfranwyr, awdurdodau lleol, archwilwyr, ymgynghorwyr ariannol a'r elusennau eu hunain.
- Y rhaglen Ymweliadau Adolygu sy'n cynnwys asesiad o dryloywder ac atebolrwydd elusennau fel rhan o'i hadolygiad o effeithiolrwydd perfformiad elusennau.
- Y *Ffurflen Gwybodaeth Safonol* (SIR) sydd ar gyrraedd, ac a gynlluniwyd i dynnu sylw at wybodaeth ansoddol a meintiol allweddol am yr elusen, er mwyn sicrhau bod gan y cyhoedd, cyfranwyr a buddsoddwyr fwy o wybodaeth am waith elusennau.
- Adolygir SORP Elusennau yn flynyddol er mwyn sicrhau ei fod yn cyflenwi anghenion y sector ac yn cadw i fyny â safonau cyfrifo newydd a datblygiadau newydd o fewn y sector. Eleni, mae'r adolygiad yn edrych ar yr

angen am fwy o gysondeb wrth ddyrannu costau, ac am greu ffocws i hybu safon adrodd yn ôl am amcanion, gweithgareddau a gyflawnwyd a chyflawniadau ac effeithiau'r gweithgareddau hynny. Mae'r Comisiwn Elusennau ynghlwm wrth ddatblygiad SORP a fydd yn caniatáu i elusennau ddefnyddio fframwaith adrodd sy'n cwrdd â'u gofynion ei hunain a gofynion y sector.

Yr ydym yn croesawu mentrau megis Guidestar-UK a Gwobrwyon Cyfrifon Elusennau, y naill a'r llall yn annog elusennau i sicrhau bod gwybodaeth wedi ei darparu ar gyfer budd-ddeiliaid mewn modd sy'n eu cynorthwyo i asesu perfformiad yr elusen. Mae rhai elusennau yn cydnabod pwysigrwydd atebolrwydd drwy ddarparu gwybodaeth berthnasol, gan gynnwys cynllun gweithredu yn dangos sut y bwriedir cyflenwi anghenion y budd-ddeiliaid am wybodaeth.

Dylai elusennau ddilyn yr esiamplau hyn o arfer gorau er mwyn gwella safon eu tryloywder a'u hatebolrwydd.

Mae'r adroddiad hwn yn canolbwyntio'n bennaf ar dryloywder adroddiad ymddiriedolwyr am weithgareddau eu helusen yn yr Adroddiad Blynyddol a'r Cyfrifon, gan gwmpasu gofynion cyfreithiol, argymhellion SORP Elusennau a datblygu arfer da wrth adrodd yn ôl.

Mae nifer o'r elusennau a gynhwyswyd yn ein hastudiaeth yn cynhyrchu Adolygiad Blynyddol yn ogystal ag Adroddiad Blynyddol. Nid yw cynhyrchu Adolygiad Blynyddol yn ofynnol gan y gyfraith ac nid oes rhaid i'w gynnwys gydymffurfio ag unrhyw ofynion rheoleiddiol.⁵ Cynhwysai ein hymchwil ddadansoddiad o'r wybodaeth a ryddheir gan elusennau yn eu Hadolygiadau Blynyddol a'u gwefannau. Y nod oedd ceisio penderfynu a yw elusennau yn cynnwys gwybodaeth yn eu Hadolygiadau Blynyddol y dylid ei chynnwys yn eu Hadroddiadau Blynyddol ac i benderfynu i ba raddau y mae'r elusennau yn gwneud defnydd o'u Hadolygiadau Blynyddol a chyfryngau eraill er mwyn cynyddu eu tryloywder a'u hatebolrwydd.

Cyfeirio rhwng cyfryngau cyfathrebu

Dylai'r Adroddiad Blynyddol gynnig ffocws ar gyfer atebolrwydd drwy gynnwys y wybodaeth a fynnir gan y gyfraith a'r SORP Elusennau.⁶ Gellir gwella'r atebolrwydd drwy ddefnyddio dulliau cyfathrebu gwahanol, gan adlewyrchu anghenion

gwahanol budd-ddeiliaid.⁷ Mae'r mwyafrif o elusennau yn cynhyrchu swm sylweddol o ddeunydd amdanyn nhw eu hunain ac am eu gweithgareddau, yn enwedig pan ddeillia prif adnoddau ariannol yr elusen o roddion, cymynroddion ac incwm tebyg. Mae creu cyfeiriadau o'r Adroddiad Blynyddol a thrwy gyfryngau eraill at fannau lle ceir hyd i fwy o wybodaeth yn cynyddu'r tryloywder wrth i ymddiriedolwyr gyfrif am weithgareddau eu helusen. Gweler Atodiad A, Tabl 13 am fanylion o'r cysyllteddau a ddarperir gan elusennau.

Ni chaniateir cyfeirio os bydd yn cymryd lle unrhyw wybodaeth y mae'n orfodol ei chynnwys yn yr Adolygiad Blynyddol, fodd bynnag. Mae'r astudiaeth hon yn dynodi'n glir y meysydd hynny lle mae'n rhaid adrodd yn ôl ac yn dangos lle gall awgrymiadau arfer gorau wella ar y lefel sylfaenol o dryloywder ac atebolrwydd.

Roedd yr elusennau hynny sy'n dibynnu ar roddion a chymynroddion fel eu prif ffynhonnell incwm yn arbennig o dda am:

- ddarparu cysylltiadau rhwng Adroddiadau Blynyddol a dogfennau eraill er mwyn tynnu eu holl wybodaeth at ei gilydd; a
- darparu Adolygiadau Blynyddol mwy 'sgleiniog', yn cynnwys ffotograffau a gwahanol liwiau a ffontiau ayyb.

⁵ Diffinnir Adolygiadau Blynyddol yn Atodiad B.

⁶ Ceir hyd i'r rhwymedigaeth gyfreithiol i gwblhau Adroddiad Blynyddol yn Rheoliad 7(4) o Reoliadau Elusennau (Cyfrifon ac Adroddiadau) 2000. Mae'r rhain yn tanatgu'r materion a gynhwysir yn SORP.

⁷ Gall budd-ddeiliaid gynnwys: buddiolwyr, rhoddwyr ac arianwyr, gwirfoddolwyr, staff, grwpiau diddordeb, llywodraeth ganolog, ranbarthol a lleol (fel ariannwr neu luniwr polisi), partneriaid neu gyflenwyr, y cyfryngau a'r cyhoedd.

Adroddiad Blynyddol a Chyfrifon

Gofynion statudol

Rhaid i bob elusen gydag incwm gros neu gyfanswm gwariant o fwy na £10,000 baratoi Adroddiad Blynyddol a Chyfrifon a'u cyflwyno i'r Comisiwn Elusennau o fewn 10 mis o ddiwedd eu blwyddyn ariannol.⁸ Rhaid i'r ddwy ddogfen gydymffurfio â'r gofynion a nodir yn y statud a'r dulliau, egwyddorion a'r datgeliadau a nodir yn y Datganiad o Arferion Cymeradwy: Cyfrifo ac Adrodd gan Elusennau (SORP Elusennau) neu SORP mwy arbenigol lle bo hynny'n berthnasol.

Mae SORP Elusennau yn nodi'r modd y dylai elusen adrodd am y defnydd a wnaeth o'r adnoddau a ymddiriedwyd iddi ac am y gweithgareddau y mae'n ymgymryd â hwy. Bydd paratoi'r Adroddiad Blynyddol a Chyfrifon yn unol â'r SORP Elusennau nid yn unig yn sicrhau bod elusennau yn cyflawni eu dyletswyddau cyfreithiol i adrodd ond hefyd yn hybu dealltwriaeth budd-ddeiliaid o natur a chwmpas gwaith yr elusen.

Mae SORP Elusennau yn berthnasol i bob elusen yn y DU, ac eithrio pan fo SORP arall yn berthnasol (e.e. Addysg Bellach ac Uwch neu Landlordiaid Cymdeithasol Cofrestredig).⁹ Mae'r Comisiwn Elusennau yn disgwyl i bob elusen gydymffurfio yn gyfan gwbl â'r SORP perthnasol oni cheir rheswm da dros ddargyfeirio. Os digwydd hynny, rhaid cyfrif am unrhyw ddargyfeiriad yn yr Adroddiad Blynyddol a Chyfrifon. Gall unrhyw fethiant i gydymffurfio â'r SORP fod yn arwydd o fethiant yr ymddiriedolwyr

i weinyddu'r elusen yn iawn. Mae'n bosib y byddwn yn gweithredu i reoli'r sefyllfa os na all ymddiriedolwyr roi esboniad digonol dros eu methiant i gydymffurfio â'r SORP Elusennau.

Yr ydym wedi ein hymrwymo i annog elusennau i gyflwyno eu hadroddiadau statudol yn brydlon. Mae nifer o fentrau ar y gweill:

- Arolygu cyflwyniadau cyfrifon yn rheolaidd ac enwi'r elusennau hynny sy'n parhau i fethu â chyflwyno eu cyfrifon yn brydlon.
- Os yw elusen yn parhau i fethu â chyflwyno ei chyfrifon yn brydlon, byddwn yn ystyried gweithredu er mwyn rheoli'r sefyllfa.
- Ymgyrch cydymffurfio o'r enw 'Nid mater o ddewis yw cyfrifon' sy'n ceisio tynnu sylw at bwysigrwydd dychwelyd ffurflenni yn brydlon, yn gywir ac yn fanwl, drwy ganolbwyntio ar roddwyr, awdurdodau lleol, archwilwyr, ymgynghorwyr ariannol a'r elusennau eu hunain.

Argaeledd

Er mwyn cydymffurfio â'r gofynion cyfreithiol, rhaid i ymddiriedolwyr gyflwyno eu Hadroddiad Blynyddol a Chyfrifon o fewn 10 mis o ddiwedd eu blwyddyn ariannol. Mae cyflwyno yn brydlon yn dystiolaeth i'r budd-ddeiliaid o barodrydd yr elusen i fod yn atebol i'r rheolydd.

⁸ Rhwymedigaeth i gyflwyno Deddf Elusennau 1993, adran 45. Mae elusennau yn rhydd i ddewis dyddiad ar gyfer diwedd eu blwyddyn ariannol.

⁹ Gweler Tabl 2, Atodiad A am fanylion yn dangos pa SORP oedd yn berthnasol yn achos yr elusennau a ddadansoddwyd.

Dulliau cyfathrebu

Yr ydym yn defnyddio'r dulliau canlynol i sicrhau bod Adroddiadau Blynyddol a Chyfrifon elusennau ar gael i fudd-ddeiliaid eraill:

- Mae pob dogfen a gynhwysir ar y gofrestr gyhoeddus ar gael i unrhyw un â diddordeb; mae hyn yn cynnwys y ddogfen lywodraethol a'r Adroddiad Blynyddol a Chyfrifon.
- Mae cynllun peilot diweddar wedi sicrhau bod y wybodaeth hon ar gael ar-lein mewn perthynas â 300 o'r elusennau mwyaf.
- Gellir cyrchu detholiadau o fanylion allweddol pob elusen gofrestrdig ar-lein drwy ddefnyddio'r cyfleuster 'chwiliwch y gofrestr' ar ein gwefan.
- Yr ydym wedi ein hymrwymo i gefnogi mentr Guidestar-UK a fydd yn caniatáu gwell mynediad i fudd-ddeiliaid sy'n chwilio am wybodaeth allweddol yn ymwneud ag elusennau.

Mae rhai elusennau yn hyrwyddo'r argaeledd hwn eu hunain drwy gyhoeddi eu chyfrifon ar eu gwefan neu drwy eu dosbarthu i aelodau, ac rydym yn croesawu hyn. Rhaid i elusennau sicrhau

bod eu Hadroddiad Blynyddol a'u Cyfrifon ar gael i unrhyw un sydd am eu gweld (Deddf Elusennau 1993, rhan V1, ad.47 (2)).

Prydlondeb

Edrychodd ein dadansoddiad yn fanwl ar brydlondeb cyflwyniad yr Adroddiad Blynyddol a Chyfrifon i'r Comisiwn Elusennau a chamau'r broses o ddarparu Cyfrifon yr elusennau cyn eu cyflwyno. Mae'r canlyniadau fel a ganlyn:

- Methodd 13 elusen â chyflwyno eu Hadroddiad Blynyddol a Chyfrifon i'r Comisiwn Elusennau o fewn y terfyn amser statudol o 10 mis (7%).
- Cymeradwywyd Cyfrifon ymron i hanner yr elusennau o fewn 122 diwrnod (erbyn 31 Gorffennaf), ac un o fewn 52 diwrnod i ddiwedd eu blwyddyn ariannol.
- Ar gyfartaledd, cymerodd yr archwilwyr 5 niwrnod i lofnodi eu hadroddiadau archwilio wedi i'r ymddiriedolwyr wneud hynny. Wedi hynny, cymerodd ymddiriedolwyr 93 diwrnod ychwanegol, ar gyfartaledd, i gyflwyno'r adroddiad a'r datganiadau ariannol i'r Comisiwn.¹⁰

Cam	Amser a dreuliwyd ar gyfartaledd (dyddiau)	Ystod amser (cyfnod byrraf - hiraf - dyddiau)
Diwedd blwyddyn ⇒ Llofnod yr ymddiriedolwr	154	52 - 308
Llofnod yr ymddiriedolwr ⇒ Llofnod yr archwiliwr	5	0 - 91
Llofnod yr archwiliwr ⇒ Cyflwyno i'r Comisiwn Elusennau	93	3 - 234
Cyfanswm (diwedd blwyddyn hyd at gyflwyno dogfen i'r Comisiwn Elusennau)	252	

¹⁰ Roedd yr elusennau a gynhwyswyd yn y dadansoddiad hwn yn ddigon mawr i warantu archwiliad blynyddol o'u Cyfrifon. Nid yw'n ofyniad cyfreithiol i'r archwilwyr wneud dim mwy na mynegi barn am y Cyfrifon, er bod eu rheolau proffesiynol yn gofyn eu bod yn fodlon nad oes unrhyw beth o fewn yr Adroddiad Blynyddol, a datganiadau eraill a gyhoeddwyd gyda'r Cyfrifon, sy'n gwrthdaro â'r wybodaeth a ddatgelir yn y Cyfrifon.

Mae'r Adroddiad Blynyddol a Chyfrifon yn elfen allweddol o atebolrwydd a dylent fod ar gael i bob budd-ddeiliad cyn gynted â phosib wedi'r cyfnod y cyfeirir ato yn y dogfennau.

Dylai ymddiriedolwyr gyflwyno eu Hadroddiad a Chyfrifon cyn gynted â phosib; nid oes unrhyw reswm dros ddal gafael ynddynt am gyfnod hir wedi i'r archwiliwr eu llofnodi.

Ansawdd adrodd

Nid yw prydlondeb y cyflwyno yn ddigonol os yw ansawdd yr Adroddiad a Chyfrifon yn wael.

- Nid oedd 9 set o Adroddiadau a Chyfrifon a gynhwyswyd yn y dadansoddiad hwn yn cynnwys yr holl lofnodion gofynnol - cyfradd methiant o 4.5%.
- Roedd 3 set o Gyfrifon yn cynnwys camgymeriadau mathemategol er i'r ymddiriedolwyr a'r archwiliwr eu llofnodi a'u cymeradwyo.
- Roedd un cwmni archwilio wedi llofnodi a dyddio ei Adroddiad Archwilio ychydig wythnosau cyn i'r ymddiriedolwyr gymeradwyo a llofnodi'r Cyfrifon.

Mae lle i wella yma. Yr ydym yn siomedig i weld camgymeriadau o'r math yma o fewn Adroddiadau a Chyfrifon elusennau mor fawr.

Arddull a chyflwyniad Adroddiadau Blynyddol ac Adolygiadau Blynyddol

Yn ôl ein dadansoddiad nid oedd llawer o orgyffwrdd rhwng y sianelau gwahanol a ddefnyddir gan yr elusennau i gyfathrebu â'u budd-ddeiliaid.


- Cynhwysai 75% o'r 83 Adolygiad Blynyddol a ddefnyddiwyd ar gyfer yr astudiaeth hon wybodaeth a oedd yn ychwanegol at yr hyn a ddarparwyd yn yr Adroddiad Blynyddol.

(Gweler Tabl 21, Atodiad A ar gyfer dadansoddiad o'r meysydd hynny lle cafwyd gwybodaeth ychwanegol neu ddyblygedig.)

Gall fod y dyblygiad hwn yn bodoli yn rhannol am fod y dogfennau yn targedu gwahanol gynulleidfaoedd. Mae arddull a chyflwyniad yr Adroddiad Blynyddol a Chyfrifon yn awgrymu iddynt gael eu trefnu ar gyfer y rheolydd, ac i bob golwg defnyddir yr Adolygiad Blynyddol at bwrpasau cyhoeddusrwydd a chodi arian yn gyffredinol.

Dulliau cyfathrebu

I bob golwg roedd gan rai adolygiadau bwrpas deublyg ac fe'u marciwyd yn unol â hynny. Ar sail eu hymddangosiad a'u cynnwys, barnwyd bod:



Yn aml, ychydig iawn o wybodaeth a geir mewn Adroddiadau Blynyddol am y gweithgareddau a'r cyflawniadau a fu yn ystod y flwyddyn. Fel arall cynhwysir dim ond gwybodaeth lefel-uchel am weithgareddau; rhoddir gwybodaeth ychwanegol o'r math hwn yn yr Adolygiad Blynyddol. Yr ydym o'r farn bod nifer sylweddol o'r Adolygiadau Blynyddol hyn yn fwy 'cyfeillgar i'r darllynydd' a diddorol o safbwynt gweledol na'r Adroddiadau Blynyddol, ac yn gwneud gwell ddefnydd

o wahanol deipiau, ffotograffau, diagramau a dyfyniadau gan fuddiolwyr. Er hyn, barnwyd bod 95% o'r Adroddiadau Blynyddol yn hawdd eu darllen, ac yn gwneud defnydd da o benawdau, naratif clir ayyb. Mae'n arfer da i gyflwyno gwybodaeth mewn arddull hygyrch sy'n rhydd o jargon, ac felly mae'n galonogol i weld bod y mwyafrif o'r elusennau a ddadansoddwyd yn cyflwyno eu gwybodaeth yn eglur.

O blith yr 83 Adolygiad Blynyddol a archwiliwyd, roedd:

- 65 (78%) yn cynnwys graffiau a thablau hunan eglurhaol.
- 55 (66%) yn cynnwys dyfyniadau gan fuddiolwyr.
- 80 (96%) yn defnyddio ffotograffau i helpu i gyfleu'r neges.
- 69 (83%) yn defnyddio dull ysgrifennu a oedd yn rhwyddach ei ddarllen na'r dull a ddefnyddiwyd yn yr Adroddiad Blynyddol.

Mae hyn yn cymharu â'r defnydd canlynol o gynorthwyon cyflwyno yn yr Adroddiadau Blynyddol. Yma, roedd:

- 8% yn cynnwys graffiau hunan eglurhaol.
- 17% yn cynnwys tablau.
- 10% yn cynnwys ffotograffau.
- 65 (78%) o'r Adolygiadau yn cynnwys adroddiadau crynodedig, mewn cyferbyniad â'r 10-20 tudalen yng nghofnodion llawn yr Adroddiad.

Darparodd yr elusennau wybodaeth yn eu Hadolygiadau Blynyddol a oedd yn ychwanegol i'r hyn a gaed yn yr Adroddiad, a hynny yn y meysydd canlynol:

- Cymarebau ariannol 29 (35% o'r Adolygiadau oedd ar gael).
- Ffigurau o fewn pennawd 50 (60%).
- Gwybodaeth er mwyn creu effaith 78 (94%).
- Gwybodaeth am ganlyniadau 77 (93%).
- Cynlluniau ar gyfer y dyfodol 59 (71%).

O bryd i'w gilydd, rhoddwyd y teitl "Adroddiad Blynyddol" i'r Adolygiad Blynyddol, er bod Adroddiad Blynyddol, a luniwyd yn unol ag adran 45 o Ddeddf Elusennau 1993, ynghlwm wrth y Cyfrifon ym mhob un o'r achosion hynny. Er y gall fod yn fanteisiol i gynnwys popeth o fewn un cyhoeddiad, gallai hyn beri dryswch ynglŷn â pha rannau o'r llyfryn sy'n cynnwys y dogfennau statudol. Pan gynhyrchir dogfen gyfunol, mae'n bwysig bod yr elusennau'n labelu pob adran er mwyn dangos yn glir pa adran sy'n perthyn i'r Adroddiad Blynyddol.

Mewn achosion eraill, cyfeiriai'r Adolygiad Blynyddol at nifer o elusennau "cysylltiedig" (e.e. Landlordiaid Cymdeithasol Cofrestredig) neu, i'r gwrthwyneb, cyhoeddwyd arolwg o weithgareddau'r flwyddyn gan gorff rhanbarthol. Gallai hyn beri dryswch ac amharu ar dryloywder adroddiad yr elusen. Dylai ymddiriedolwyr sicrhau ei bod yn amlwg at ba elusen y mae Adolygiad Blynyddol yn cyfeirio.

Mae'n amlwg bod rhai elusennau yn gwneud defnydd o'r Adolygiadau Blynyddol mewn modd sy'n cynyddu lefel yr atebolrwydd a geir yn yr Adroddiad Blynyddol a Chyfrifon. Mae hyn yn arfer da gan ei fod yn caniatáu i'r elusennau roi mwy o wybodaeth fanwl nad yw'n perthyn i'r Adroddiad Blynyddol. Er mwyn elwa'n llawn ar hyn, dylai'r elusennau sicrhau eu bod yn cyfeirio'u darllenwyr at y wybodaeth ychwanegol. Mae tablau 13 a 24 yn dangos nad yw'r ymddiriedolwyr yn cyfeirio'u darllenwyr o'r Adolygiad Blynyddol at gyfryngau eraill o wybodaeth i'r graddau y dylent, ar hyn o bryd.

Hygyrchedd Adolygiadau Blynyddol

Cymerwyd yr Adolygiadau Blynyddol a astudiwyd o wefannau, gwnaed cais amdanynt gan yr elusennau neu defnyddiwyd copi o'n casgliad ein hunain os cyflwynwyd hwy'r un pryd â'r Adroddiad Blynyddol a Chyfrifon.

- Cyfeiriai 10 o'r Adolygiadau Blynyddol a lwythwyd i lawr o'r gwefannau at y flwyddyn flaenorol (h.y. hyd fis Mawrth 2002) er bod adroddiad mis Mawrth 2003 eisoes yn nwylo'r Comisiwn.
- Roedd rhai o'r Adolygiadau yn anodd eu llwytho i lawr o'r gwefan neu'n anodd eu darllen os llwyddwyd i gael gafael arnynt o gwbl.
- Nid oedd rhai o'r Adolygiadau Blynyddol ar y gwefan o gwbl a bu'n rhaid holi'r elusen yn uniongyrchol am gopi.
- Codai un elusen £15 am gopi caled o'i Hadolygiad Blynyddol.
- Cynhyrchai un elusen Adolygiad chwe-misol. Ni chynhyrchwyd y ddogfen oni bai bod arian ar gael i wneud hynny.

Mae Adolygiadau Blynyddol yn gyfrwng pwysig ar gyfer cynnig gwybodaeth ychwanegol i fudd-ddeiliaid na chynhwysir yn yr Adroddiad Blynyddol a Chyfrifon, neu a gynhwysir yno mewn modd llai darllenadwy. Er mwyn gwneud y mwyaf o'r Adolygiad Blynyddol o safbwynt cynyddu tryloywder ac atebolrwydd, dylai'r elusennau sicrhau bod modd i fudd-ddeiliaid gael gafael yn rhwydd ar gopi o'u Hadolygiad Blynyddol.

Gwefannau

Gall gwefannau gynnig gwybodaeth allweddol ynglŷn â gweithgareddau a blaenoriaethau elusennau.

- O blith y 188 elusen yn yr arolwg a ddefnyddiai gwefan, cyfeiriodd 21% at eu gwefan yn eu Hadroddiad Blynyddol.

Wrth gasglu'r Adolygiadau Blynyddol ar gyfer yr ymchwil, cafwyd bod y mwyafrif o wefannau'r elusennau yn gymharol rwydd i'w defnyddio, ond roedd rhai ohonynt yn peri dryswch, a bu'n rhaid gwneud o leiaf 10 cais cyn cyrraedd y tudalen iawn. Gan fod budd-ddeiliaid o bob math yn gwneud defnydd cynyddol o'r we, dylai'r elusennau ystyried ymhellach ynglŷn â defnyddio'u gwefannau fel cyfrwng i ddarparu eu Hadroddiadau Blynyddol a Chyfrifon a'u Hadolygiadau Blynyddol.

Yn unol ag arfer da, dylai ymddiriedolwyr:

- Ystyried arolygu eu budd-ddeiliaid er mwyn deall eu hanghenion.
- Adolygu'r gwefan yn gyson er mwyn sicrhau bod y wybodaeth yn gyfredol ac yn rhwydd ei chyrraedd, a chyhoeddi'r Adroddiad Blynyddol a Chyfrifon ar-lein ble bynnag y bo modd.
- Ystyried defnyddio'r Adolygiad Blynyddol i groesgyfeirio at y gwefan a'r Adolygiad Blynyddol.
- Gynnwys Cyfrifon crynodedig yn yr Adolygiad Blynyddol i helpu pobl heb brofiad o gyfrifon i'w deall.

- Gyhoeddi eu Hadolygiad Blynyddol ar yr un pryd â'r Adolygiadau Blynyddol a Chyfrifon er mwyn hybu hygyrchedd gwybodaeth gyfredol. Yn ogystal, yn ei dro dylai ymddiriedolwyr sicrhau bod y wybodaeth yn y Ffurflen Gwybodaeth Safonol yn cyfeirio at yr un cyfnod.
- Sicrhau bod label clir ar bob adran o ddogfen gyfunol er mwyn dangos yn glir ym mha ran o'r llyfryn y ceir hyd i'r Adroddiad Blynyddol, a gynhyrchwyd yn ôl gofynion adran 45, Deddf Elusennau 1993 a bod yr Adroddiad Blynyddol yn cynnwys yr holl wybodaeth a fynir gan y Rheoliadau, y SORP Elusennau a, lle bo hynny'n berthnasol, Deddf Cwmnïau 1985.

Mae enghreifftiau eglurhaol o arfer da yn cynnwys:

Elusen a sefydlwyd er mwyn helpu'r deillion i gynhyrchu fersiwn Braille o'i Hadolygiad Blynyddol. Mae elusen arall sy'n gweithio o fewn maes tebyg yn defnyddio ffurf-deip mwy o faint wrth gynhyrchu ei hadroddiad, er mwyn helpu ei buddiolwyr i'w ddarllen.

Elusennau Cymraeg sy'n cynhyrchu eu Hadolygiadau Blynyddol yn Gymraeg yn ogystal â Saesneg.

Adolygiad Blynyddol ar ffurf calendr desg, er mwyn cynyddu ei effaith a'i hygyrchedd.

Adroddiad Blynyddol yn cynnwys cynrychioliad gweledol o flaenoriaethau'r elusen am y flwyddyn, gyda'i buddiolwyr ar ben y siart, yn rhoi ffocws i'r adroddiad.

Datganiadau am yr hyn y mae'r elusen yn ceisio ei wneud

Amcanion elusennol

Mae'r SORP Elusennau yn datgan y dylai'r Adroddiad Blynyddol, wrth esbonio diben sefydlu'r elusen a'i dulliau o gyflawni ei hamcanion, gynnwys "esboniad o amcanion yr elusen. Dylid gwneud hyn drwy gyfeirio at y ddogfen lywodraethol ond hefyd gall gynnwys datganiad o genhadaeth yr elusen" (para 31).

Er mwyn sicrhau tryloywder ac atebolrwydd mae'n ofynnol cael esboniad o'r hyn y mae'r elusen yn ceisio ei wneud, ynghyd â'i gweithgareddau o fewn y cyddestun hwnnw. Mae amcanion yr elusen yn ffurfio'r sail gyfreithiol a'r sail resymegol dros ei bodolaeth ac felly dylent fod yn sail i bopeth a gyflawnir gan yr elusen. Mae datganiad o amcanion yn yr Adroddiad Blynyddol, ynghyd â datganiad o nodau a chenhadaeth, yn caniatáu i fudd-ddeiliaid ddeall beth yw pwrpas yr elusen a'r modd y mae elfennau eraill yr Adroddiad yn berthnasol i'w chyflawniad o'r pwrpas hwnnw.

Yn ôl ein dadansoddiad o 200 o Adroddiadau Blynyddol, roedd:

- 81% yn disgrifio eu hamcanion mewn modd 'manwl iawn a hygyrch'.
- 76% yn cynnig esboniad o nodau a chenhadaeth yr elusen mewn modd 'manwl iawn a hygyrch'.
- 14% yn rhoi 'rhywfaint' neu 'ychydig' o fanylion am amcanion yr elusen.
- 22% yn rhoi 'rhywfaint' neu 'ychydig' o fanylion am nodau a chenhadaeth yr elusen.
- 11 elusen yn cynnig dim manylion o gwbl am eu hamcanion.
- 5 elusen yn cynnig dim esboniad o nodau a chenhadaeth yr elusen.

O blith yr 11 elusen na roddodd unrhyw fanylion am eu hamcanion, rhoddodd 36% fanylion da am eu nodau a'u cenhadaeth yn eu lle.

Mae'r elusennau hynny sy'n darparu ychydig iawn neu ddim gwybodaeth am eu hamcanion, eu nodau a'u cenhadaeth yn ddiffygiol o safbwynt agwedd allweddol ar dryloywder ac atebolrwydd. Mae lle i wella yn y maes hwn.

Statws elusennol

Mae rhif cofrestru elusen yn dystiolaeth o statws elusennol ac yn arwydd bod ei hamcanion yn gwbl elusennol; ni fydd y Comisiwn Elusennau yn cofrestru sefydliad os nad yw'n hyderus bod ei hamcanion yn gwbl elusennol ac o fudd i'r cyhoedd. Y mae nifer o eithriadau wedi'u heithrio o gofrestru, ond roedd pob un o'r elusennau a astudiwyd wedi'u cofrestru. Dylai'r Adroddiad Blynyddol ddatgelu rhif cofrestru'r elusen er mwyn caniatáu i'r budd-ddeiliaid adnabod y sefydliad yn rhwydd, sicrhau ei statws fel elusen gofrestredig a gwneud ymholiadau pellach ynglŷn â'r elusen os dymunant wneud hynny.

- O blith y 200 elusen a ddadansoddwyd datgelodd 95% ohonynt eu rhif cofrestru.
- Roedd mwy na hanner o'r elusennau na wnaeth hyn yn Landlordiaid Cymdeithasol Cofrestredig (RSLau), sy'n dilyn argymhellion SORP nad ydynt yn gofyn am ddatgelu rhif yr elusen.

Datganiadau am yr hyn y mae'r elusen yn ceisio ei wneud

Mae rhif sylfaenol yr elusen yn wybodaeth sylfaenol na ddylid byth ei hepgor o'r wybodaeth a ddarperir gan elusen, hyd yn oed pan nad yw ei SORP yn gofyn yn benodol amdano.

Categoriadau elusennau

Mae tryloywder o fewn Adroddiad Blynyddol elusennau yn golygu datgelu pa fath o elusennau ydynt. Mae'n bwysicach nag erioed bod budd-ddeiliaid yn gallu categorio elusennau, yn sgil y defnydd cynyddol a wneir o ddata cymharol; er mwyn gwneud cymariaethau ystyrlon, rhaid i fudd-ddeiliaid fedru cymharu elusennau sy'n debyg i'w gilydd.

Roedd ein dadansoddiad yn cynnwys ymgais i drefnu'r elusennau yn ôl pedwar categori gwahanol - yn ôl dogfen lywodraethol, gweithgaredd, prif ffynhonnell incwm a math o wariant elusennol.

Yn ôl dogfen lywodraethol

Mae gwybodaeth am ffurf gyfreithiol elusen, a bennir gan ei dogfen lywodraethol, yn gosod cyd-destun ar gyfer pob darn arall o wybodaeth yn ymwneud â'r elusen. Yn ogystal, rhaid i elusennau ddatgelu eu ffurf gyfreithiol yn unol â gofyniad y SORP Elusennau.¹¹ Dylai'r elusennau ddatgelu'r wybodaeth hon bob amser.

- Datgelodd 85% o'r elusennau a ddadansoddiwyd y math o ddogfen lywodraethol a ddefnyddiwyd, yn eu Hadroddiadau Blynyddol.

- Methodd 15% â datgelu gwybodaeth ddigonol am y math o ddogfen lywodraethol a ddefnyddiwyd.
- Roedd 74% o'r 200 elusen yn gwmnïau cyfyngedig drwy warant.
- Roedd bron bob un o'r elusennau hynny a fethodd â datgelu'r math o ddogfen lywodraethol a ddefnyddiwyd yn gwmnïau cyfyngedig drwy warant - gan olygu bod 20% o elusennau o'r math hwn wedi methu â chyrraedd y nod.

Yn ôl gweithgaredd

Gosodwyd elusennau mewn categorïau gweithgaredd priodol ar sail gwybodaeth a ddatgelwyd yn yr Adroddiad Blynyddol.¹² Yn y rhan fwyaf o achosion, roedd digon o wybodaeth ar gael i wneud hynny'n ddiraffferth. Gweler Atodiad A, Tabl 3 am fanylion.

Yn ôl prif ffynhonnell/ffynonellau incwm a math o wariant

Roedd yn waith cymharol rwydd i osod elusennau yn eu categorïau priodol yn ôl eu prif ffynonellau incwm a hefyd eu gwariant gan fod safon y datgelu yn y Datganiad o Weithgareddau Ariannol a'r nodiadau ategol yn dda, ar y cyfan.¹³

Mae gallu budd-ddeiliaid i adnabod, yn ôl yr Adroddiad Blynyddol, y math o elusen y cyfeirir ati, yn elfen allweddol o dryloywder ac atebolrwydd, ac yn rhywbeth a ddylai ddod yn rhwydd i elusennau o'r maint a ddadansoddiwyd. Er eu bod yn dda am ddatgelu eu gweithgareddau a'u math o incwm a gwariant, mae lle i'r elusennau hyn wella o ran datgelu eu ffurf gyfreithiol.

¹¹ Y pump prif fath o elusen yw - cwmnïau cyfyngedig (fel arfer yn gyfyngedig drwy warant), elusennau anghorfforedig (ymddiriedolaethau neu gymdeithasau), elusennau corfforedig drwy Siartr Frenhinol ac elusennau corfforedig drwy Ddeddf Seneddol. Yn ôl eu trefn, mae eu dogfennau llywodraethol fel a ganlyn: Memorandwm ac Erthyglau Cwmni, y Ddogfen Ymddiriedolaeth neu'r cyfansoddiad, y Siartr Frenhinol neu'r Ddeddf.

¹² Nodir y categorïau a ddefnyddiwyd yn y Caritas Data Top 3000.

¹³ Deilliai'r categorïau incwm a ddefnyddiwyd yn y dadansoddiad hwn yn bennaf o SORP Elusennau. Deilliai'r categorïau gwariant o'r dosbarthiadau a gynhwyswyd ar Ffurflen Flynyddol y Comisiwn Elusennau.

Datganiadau am yr hyn y mae'r elusen yn ceisio ei wneud

Ni sefydlwyd dull penodol o gategoreiddio elusennau yn ôl eu gweithgaredd o fewn y sector, a gallai hynny fod yn faen tramgwydd i fudd-ddeiliaid sy'n ceisio cymharu'r elusennau mewn modd ystyrlon.¹⁴

Ar gyfer pob elfen o dryloywder ac atebolrwydd a drafodwyd yn ein dadansoddiad, dadansoddwyd y canfyddiadau er mwyn canfod unrhyw amrywiadau sylweddol o'r norm a seiliwyd ar y math o elusen ydoedd. Ceir hyd i'r canlyniadau yn adrannau perthnasol yr adroddiad hwn.

Yn unol ag arfer da, dylai ymddiriedolwyr:

- Ddarparu manylion o arwyddocâd ymarferol eu hamcanion, efallai drwy gynnwys datganiad o genhadaeth neu ddatganiad o nodau ac amcanion allweddol.
- Esbonio'r cysylltiad rhwng y gweithgareddau yr ymgymerir â hwy a chyflawniad amcanion.
- Ystyried a yw'n briodol i ddangos bod unrhyw newidiadau o ran gweithgareddau yn parhau i gwrdd â'r amcanion.
- Ddatgan bod amcanion yr elusen yn parhau i fod yn briodol, gan ddangos eu bod wedi ystyried hyn (gallai hyn gynnwys ystyried a ddylid dirwyn yr elusen i ben, cyfundoddi, newid yr amcanion neu newid y dull o weithio).
- Ddarparu gwybodaeth sy'n caniatáu i fudd-ddeiliaid ddeall diben a gweithgareddau'r elusen er mwyn hwyluso cymariaethau ag elusennau eraill cyffelyb.

¹⁴ Er enghraifft, mae'n bosib bod elusen sy'n darparu asedau ffisegol i fuddiolwyr (a fyddai'n ei gosod mewn un categori) yn gwneud hynny at bwrpas sy'n ei gosod mewn categori arall - gallai elusen sy'n darparu cartrefi i ddosbarth arbennig o fuddiolwyr fod yn perthyn i "Tai a Materion Cymunedol" neu "Gwasanaethau a Chymorth Cymdeithasol".

Mae darparu gwybodaeth hygyrch am fewnbwn elusen yn hanfodol er mwyn caniatáu i fudd-ddeiliaid gymharu ei mewnbwn â'i hallbwn a thrwy hynny asesu a yw'n defnyddio'i hadnoddau yn effeithiol.

Mae'r bennod hon yn edrych yn fanwl ar dryloywder datgeliadau elusennau am fanylion eu mewnbwn a'u cydberthynas â nodau, amcanion, gweithgareddau, perfformiad a chyflawniadau'r elusen, a'i chynlluniau at y dyfodol.

Pobl

Ymddiriedolwyr

Yn yr adroddiad hwn mae'r adran yn ymwneud â strwythur cyfundrefnol yn delio â datgeliadau am ymddiriedolwyr.

Gweithwyr

Ar y cyfan, roedd yr elusennau a ddadansoddiwyd yn dda am roi gwybodaeth sylfaenol ynglŷn â nifer eu staff a meysydd eu gwaith. Mae gofyn cynnwys yr wybodaeth hon mewn nodyn yn y Cyfrifon, trefn sydd wedi aros yr un fath am nifer o flynyddoedd.

Fodd bynnag, yn gyffredinol nid oedd yr Adroddiadau Blynyddol yn cynnwys llawer o wybodaeth am nifer y staff yn ystod y flwyddyn nac am newidiadau mawr yn y modd y trefnir staff gan gynnwys eu lleoliad, eu hyfforddiant a'r ffordd mae hyn yn cyfrannu at amcanion cyfundrefnol. Mae'n bwysig cynnwys y manylion hyn am y staff er mwyn i'r budd-ddeiliaid gael darlun clir o'r modd y gweinyddir yr elusen ac y defnyddir ei hadnoddau ariannol.

- Roedd 60 o'r Adolygiadau Blynyddol yn cynnwys manylion da am staff a lefelau staffio (30%).
- Ni chyfeiriodd 49 o'r elusennau at staff o gwbl (25%).

Gwirfoddolwyr

Yn aml mae mewnbwn gwirfoddolwyr yn rhan allweddol o redeg elusen. Mae gwirfoddolwyr yn cyflawni amrywiaeth o weithgareddau, gan gynnwys codi arian a gweithgareddau gweinyddol.

- Roedd 54% o Adroddiadau Blynyddol elusennau a ddefnyddiai gwirfoddolwyr yn cynnwys sylwadau ar eu cyfraniad.
- Yn aml nid oedd y sylwadau hyn yn cynnwys llawer o fanylion.

Mae'n ofynnol bod elusennau yn adrodd am effeithiolrwydd eu gwirfoddolwyr yn eu Hadroddiadau Blynyddol, ond nid oes rhaid iddynt roi gwerth ar eu cyfraniad yn y Cyfrifon. Heb wybod i ba raddau y mae gwirfoddolwyr yn cyfrannu at weithgareddau elusen, ni all budd-ddeiliaid wneud dyfarniadau ystyrlon am ei pherfformiad a'i heffeithiolrwydd. Os bydd elusen yn gwneud defnydd sylweddol o wirfoddolwyr er mwyn cynnal ei gweithgareddau elusennol neu weithgareddau i godi arian, dylid esbonio hynny. Er bod materion yn ymwneud â mesur, gan gynnwys rhoi gwerth economaidd ar gyfraniadau gwirfoddol didâl, yn peri na ellir cynnwys cyfraniadau o'r fath o fewn y Datganiad o Weithgareddau Ariannol, mae'n bwysig bod darllenwyr yn cael digon o wybodaeth i fedru deall rôl a chyfraniad gwirfoddolwyr. Er enghraifft, gall gwybodaeth o'r fath esbonio'r gweithgareddau y mae gwirfoddolwyr yn helpu i'w cynnal a mesur y cyfraniad

hwnnw yn nhermau oriau neu staff a gyflogir, gan roi awgrym o werth y cyfraniad.

Ar y cyfan, roedd yr elusennau a ddadansoddwyd yn dda am roi sylwadau ynghylch eu hadnoddau dynol, ond gallent gynnig mwy o'r math o wybodaeth ychwanegol sy'n rhoi darlun llawnach i fudd-ddeiliaid o gyfraniad y bobl sy'n ymgymryd â gwaith yr elusen.

Eiddo

At bwrpas y dadansoddiad hwn, mae eiddo yn cynnwys tir, adeiladau ac asedau diriaethol eraill (megis cyfrifiaduron a meddalwedd, cerbydau a darnau gosod a gosodiadau) a adlewyrchir yn y datganiadau ariannol ac asedau anghyffyrddadwy nad ydynt yn ymddangos, o reidrwydd, yn y Cyfrifon.¹⁵

- Ystyriwyd bod 17% o'r Adroddiadau Blynyddol a ddadansoddwyd yn cynnwys manylion da am asedau diriaethol ac anghyffyrddadwy'r elusen, ac roedd 13% o'r gweddill yn cynnwys rhywfaint o fanylion.
- Yn aml, ni wnaed dim mwy na thrawsgyfeirio at y nodyn perthnasol o fewn y Cyfrifon.

Nid yw'n ofynnol i gynnwys manylion am eiddo yn yr Adroddiad Blynyddol. Fodd bynnag, heb y manylion hyn ni all budd-ddeiliaid werthfawrogi swm a sylwedd asedau'r elusen a'u cyfraniad i

weithgareddau'r elusen a chyflawniadau ei hamcanion. Mae'n arfer da i roi'r wybodaeth hon er mwyn bod yn gwbl atebol, yn hytrach na chydymffurfio â'r gofynion statudol yn unig.

Cyllid ac incwm

Yn achos yr elusennau a ddadansoddwyd, £7.2bn oedd cyfanswm eu hadnoddau yn dod i mewn am y flwyddyn yn gorffen 31 Mawrth 2003. Byddem yn disgwyl safon uchel o dryloywder ac atebolrwydd gan yr elusennau hyn er mwyn caniatáu i fudd-ddeiliaid benderfynu pa mor effeithiol y defnyddiwyd yr adnoddau sylweddol hyn.

Yn achos yr elusennau a ddadansoddwyd, y tri phrif ffynhonnell incwm oedd:

- Incwm o fasnach (38%).
- Grantiau/ffioedd o'r llywodraeth ganolog/leol (37%).
- Rhoddion, cymynroddion ac incwm tebyg (20%).

Os ydynt yn cydymffurfio gyda'r SORP Elusennau, bydd y Cyfrifon yn dangos prif ffynonellau incwm yr elusen i'r darllenwr. Fodd bynnag, y mae llawer o fudd-ddeiliaid yn amhrofiadol o ran dadansoddi Cyfrifon, a byddant yn troi at yr ymddiriedolwyr am esboniad o'r ffigurau yn yr Adroddiad Blynyddol. Mae esbonio'r incwm a'r newidiadau sy'n digwydd o flwyddyn i flwyddyn yn arfer da ac yn sicrhau bod budd-ddeiliaid yn deall pa adnoddau sydd ar gael i'r elusen.

¹⁵ Er enghraifft, asedau hanesyddol neu anaralladwy na chafodd eu cyfalafu, patentau, trwyddedau a nodau masnach, enw a/neu logo'r elusen.

Prin iawn oedd sylwadau rhai elusennau ar faterion ariannol, ac yn aml cyfeiriwyd y darllenwr at y Cyfrifon. Cynigiodd eraill sylwadau sylweddol, gan esbonio prif elfennau'r Cyfrifon a'r rhesymau dros newidiadau sylweddol a ddigwyddai o flwyddyn i flwyddyn.

- Rhoddodd 36% o elusennau esboniad manwl o'r prif ffynonellau incwm am y flwyddyn.
- Rhoddodd 53% rywfaint o esboniad.
- Ni roddodd 13% unrhyw esboniad o gwbl.

Yn ogystal, bwriodd y dadansoddiad olwg ar y nodiadau eglurhaol a'r nodiadau yn y Datganiad o Weithgareddau Ariannol (SoFA):

- Yn achos 38% o'r elusennau roedd un neu fwy o'r nodiadau eglurhaol ar goll.
- O blith y rhain, roedd y bylchau mwyaf sylweddol yn ymwneud â dadansoddi ac esbonio ffioedd/grantiau derbyniadwy, rhoddion a chymynroddion ac incwm o siopau ac o ganlyniad i weithgareddau elusennol (gweler Atodiad A, Tablau 16 a 17 am fanylion pellach).

Codi arian

Mae'n ofynnol gan y SORP Elusennau i gynnwys sylwadau ar effeithiolrwydd gweithgareddau codi arian, pan fo rheiny'n sylweddol, yn yr Adroddiad Blynyddol, ac mae'n hanfodol er mwyn hybu dealltwriaeth budd-ddeiliaid o'r modd y mae elusen yn derbyn ei hincwm.

Yn ôl canlyniadau ein dadansoddiad, roedd:

- 30% o'r elusennau yn cynnwys naratif da a hygyrch am godi arian yn eu Hadroddiadau Blynyddol.
- 38% yn rhoi rhywfaint o fanylion.
- 22% yn dweud dim byd o gwbl.

Ar y cyfan, ni roddai'r Adolygiad Blynyddol fwy o fanylion ynghylch codi arian. Er bod 42% o'r Adolygiadau Blynyddol wedi eu cynllunio, i bob golwg, yn benodol ar gyfer helpu i godi arian (Tabl 22), tueddent i ddangos y defnydd a wnaed o'r arian a godwyd yn hytrach na rhoi manylion am lwyddiant (neu ddiffyg llwyddiant) ymdrechion i godi arian. Er enghraifft, efallai fod gan fentrau newydd i godi arian gostau dechreuol uchel sy'n effeithio ar ganlyniadau ariannol y gweithgaredd.

O ystyried y diddordeb a'r sylwadau a ddaw o'r math yma o weithgareddau, mae'r prinder manylion yn yr Adroddiadau a'r Adolygiadau Blynyddol yn annisgwyl. Mae digon o le i wella yma.

Incwm anghyfyreddadwy

Mae'r mwyafrif o elusennau yn derbyn buddion yn rhad ac am ddim, neu ar ddisgownt sylweddol.¹⁶ Pan fo hynny'n digwydd, ac yn yr achosion hynny lle mae modd ei fesur, mae'r SORP Elusennau yn gofyn bod elusennau yn nodi hyn yn eu Cyfrifon, naill ai ar ffurf cost i'r rhoddwr neu ar ffurf prisiad a wnaed gan yr ymddiriedolwyr.

¹⁶ Nid yw'r adran hon yn cynnwys cyfraniad gwirfoddolwyr, a drafodwyd yn gynt.

Mae enghreifftiau o hyn yn cynnwys achosion lle mae elusen yn defnyddio adeilad am ddim, yn cael rhywfaint o'i gwasanaethau gweinyddu gan gwmni masnachol am ddim neu yn cael "benthyg" staff gan gwmni masnachol yn ddi-dâl. Ym mhob un o'r achosion hyn, dylai'r nodiadau yn y Cyfrifon gydnabod bod yr elusen yn derbyn y gwasanaethau hyn am ddim. Os nad yw'n bosibl eu gwerthuso, dylid dweud hynny.

Roedd datganiadau ariannol nifer o elusennau yn awgrymu nad oedd ganddynt unrhyw weithwyr cyflogedig na chostau eiddo. Mae'n amlwg nad yw hyn yn wir, gan na fyddai'r elusen yn gallu bodoli hebddynt. Os yw'r wybodaeth hon ar goll, ni all budd-ddeiliaid asesu pa mor effeithiol yw'r defnydd a wneir o adnoddau'r elusen.

Yn achos nifer sylweddol o'r Adroddiadau Blynyddol a'r Cyfrifon a ddadansoddiwyd, ni chyfeiriai'r ymddiriedolwyr at nwyddau a gwasanaethau a dderbyniwyd am ddim neu ar ddisgownt sylweddol. Mae hyn yn awgrymu nad ydynt yn ymwybodol o'r angen i gyfeirio atynt yn y Cyfrifon, os ydynt yn sylweddol ac os oes modd mesur eu gwerth.

Dylai tryloywder adrodd ganiatáu i fudd-ddeiliaid gael mynediad rhwydd i wybodaeth am *bob un* o fewnbynau sylweddol elusen. Lle nad yw'n ofynnol i ddarparu manylion yn yr Adroddiad Blynyddol, rhaid i ymddiriedolwyr ddweud ymhle y ceir hyd i fwy o wybodaeth. Roedd y ganran o elusennau a ddarparai lefel dda o wybodaeth am fewnbynau mewn

perthynas â'r meysydd hynny a drafodir yn y dadansoddiad yn siomedig ac mae llawer o le i wella.

Yn unol ag arfer da, dylai ymddiriedolwyr:

- Roi mwy o fanylion am faint cyfraniad gwirfoddolwyr yn yr Adolygiad Blynyddol drwy gynnwys amcangyfrif o'u hamser, fel y mae nifer o elusennau yn ei wneud yn barod. Pan gyfunir hyn â'r data am weithwyr cyflogedig a ddatgelwyd yn barod, ceir darlun llawnach o lawer o'r amser a roddir i'r elusen gan wahanol ffynonellau.¹⁷
- Ystyried sut orau y gellid cyfleu'r nwyddau, y gwasanaethau a'r amser y mae'r elusen yn eu derbyn am ddim, neu ar ddisgownt sylweddol, a sicrhau bod y wybodaeth yn cael ei datgelu'n briodol yn y Cyfrifon a thrwy gyfrwng sylwadau priodol yn yr Adroddiad Blynyddol.
- Gynnwys sylwadau yn eu Hadroddiad Blynyddol ar gwmpas a chanlyniad ariannol gweithgareddau i godi arian, gan gynnwys costau dechreuol, er mwyn gwella eu hatebolrwydd yn ogystal â chydymffurfio â'r SORP Elusennau.
- Sicrhau bod yr Adroddiad Blynyddol yn cynnwys sylwadau digonol ar ffynonellau incwm, amrywiadau o flwyddyn i flwyddyn a pherfformiad yn erbyn y gyllideb.

¹⁷ Yn 2003 cyflwynwyd dogfen drafod gan Grŵp Ymddiriedolwyr Ariannu Elusennau ("Inputs matter - Improving the quality of reporting in the charity sector") a awgrymai y dylid cynnwys yr amser a roddwyd gan wirfoddolwyr i elusen yn y Cyfrifon, wedi'i werthuso yn ôl cyfradd safonol.

- Ystyried mynd ymhellach na gofynion SORPau Elusennau (a lle bo hynny'n berthnasol, Deddf Cwmnïau 1985) drwy gynnwys yn eu Hadroddiad Blynyddol grynodedb o brif asedau'r elusen (wedi'u cyfalafu neu beidio), y defnydd a wneir ohonynt ac unrhyw newidiadau mawr a ddigwyddodd iddynt yn ystod y flwyddyn. Mae cyfeirio at fannau lle ceir manylion

llawn am asedau diriaethol ac anghyffyrddadwy yn enghraifft arall o arfer da.

- Ystyried a fyddai cynnwys enw eu prif weithredwr a'u swyddogion gweithredol hŷn a chynnwys manylion bywgraffyddol yn eu Hadroddiad Blynyddol yn ddefnyddiol i'w budd-ddeiliaid.

Gweithgareddau a chyflawniadau

Mae elusennau yn bodoli er mwyn cyflawni amcan penodol a nodir yn ei dogfen lywodraethol. Er mwyn i sefydliad gael ei gofrestru fel elusen, rhaid i'w amcan fod o fudd i'r cyhoedd. O ganlyniad, mae gwybodaeth am weithgareddau a chyflawniadau elusen yn elfen allweddol o'i hatebolrwydd i'w budd-ddeiliaid. Os nad oes gan fudd-ddeiliaid syniad da o'r hyn y mae'r elusen wedi ei gyflawni gyda'i hadnoddau, ni fyddant yn gwybod a yw'r elusen yn gweithredu er budd i'r cyhoedd.

Mae'r bennod hon yn edrych ar ddatgeliadau elusennau am yr hyn a wnaethant yn ystod y flwyddyn ac, yn bwysig iawn, am yr hyn a gyflawnwyd a'r budd a ddaeth o hynny.

Mae'r datgeliad a fyynnir gan SORP Elusennau yn gymharol eang. Mae'n caniatáu hyblygrwydd i'r ymddiriedolwyr wrth adrodd am weithgareddau a chyflawniadau fel bod modd adlewyrchu amgylchiadau penodol eu helusen. Rydym wedi cyhoeddi mwy o ganllawiau yn ymwneud â'r maes yn **Reporting the Activities and Achievements of Charities in Trustees' Annual Reports (CC59)**.

Gyda golwg ar adrodd am gyflawniadau, roedd canlyniadau ein dadansoddiad yn dangos bod:

- 63% o Adroddiadau Blynyddol yn cynnwys manylion da am gyflawniadau yn ystod y flwyddyn.
- 23% yn rhoi rhywfaint o wybodaeth am y materion hyn.
- 8% yn rhoi dim ond ychydig o fanylion.
- 7% yn rhoi dim manylion o gwbl, ac felly yn methu â chwrdd â gofyniad y SORP Elusennau.
- 65% yn datgan yr hyn a wnaeth yr elusen er mwyn hyrwyddo ei hamcanion.
- 37% yn gwneud sylwadau ynglŷn â sut y bu'r gweithgareddau o fudd i ddefnyddwyr yr elusen.

Roedd y 12 elusen sy'n Gweithio Dramor yn arbennig o dda am gyflenwi'r manylion hyn (cafwyd adroddiadau manwl gan 83%), yn

ogystal â'r 12 elusen Grefyddol (75%) a'r 44 elusen Gwasanaethau Cymdeithasol a Gofal (75%).

Roedd y 39 elusen a dderbynai eu prif incwm o roddion a chymynroddion yn well na'r cyffredin am esbonio'u canlyniadau a'u heffaith yn eu Hadroddiadau Blynyddol. Cafwyd esboniad da gan 72% ohonynt o'r hyn a wnaeth eu helusennau er mwyn cyflawni eu hamcanion (65% oedd y cyfartaledd cyffredinol) a rhoddodd 44% adroddiad manwl ynglŷn â sut y bu gweithgareddau'r elusennau o fudd i'w defnyddwyr (37% oedd y cyfartaledd cyffredinol).

Mae ein hymchwil yn dangos bod yr Adroddiad Blynyddol yn aml yn rhoi ychydig iawn o wybodaeth am weithgareddau a chyflawniadau, ond bod yr Adolygiad Blynyddol yn tueddu i lenwi'r bylchau hynny gan roi darlun cyflawn i'r darllenwr:

- cafwyd manylion sylweddol yn 93% o'r Adolygiadau Blynyddol na chafodd eu cynnwys yn yr Adroddiadau Blynyddol, gyda golwg ar ganlyniadau ac effaith yr elusennau.

Mae adrodd am weithgareddau, eu heffaith a'u canlyniadau, yn elfen allweddol o atebolrwydd. Roedd ymateb y Swyddfa Gartref i adroddiad yr Uned Strategaeth, *Private Action, Public Benefit* yn cynnwys yr argymhelliad canlynol mewn perthynas â'r Ffurflen Gwybodaeth Safonol (SIR) newydd arfaethedig ar gyfer elusennau mwy o faint (yr elusennau hynny gydag incwm blynyddol o fwy na £1miliwn). Mae'r Swyddfa Gartref yn argymhell y dylai'r SIR:

"Dynnu sylw at wybodaeth ansoddol a meintiol allweddol am yr elusen, gan ganolbwyntio ar y modd y mae'n gosod ei hamcanion ac yn mesur canlyniadau yn eu herbyn."

Gweithgareddau a chyflawniadau

Er mwyn sicrhau tryloywder rhaid i fudd-ddeiliaid fedru cael mynediad rhwydd i wybodaeth am weithgareddau a chyflawniadau elusen. Mae'n galonogol, felly, i weld bod cynifer o elusennau yn cynnwys manylion am weithgareddau'r flwyddyn yn eu Hadroddiadau Blynyddol, er bod lle i wella o ran y 15% a roddodd ychydig iawn o fanylion neu ddim manylion o gwbl.

Ni ddylai gwybodaeth am weithgareddau yn yr Adolygiad Blynyddol gymryd lle lefel sylfaenol o atebolrwydd yn yr Adroddiad Blynyddol. Yn ogystal â chrynhof'r canlyniadau allweddol, mae'n arfer da i sicrhau bod yr Adroddiad Blynyddol yn cyfeirio darllenwyr at y manau hynny lle ceir hyd i fwy o wybodaeth. Yn ôl canlyniadau ein dadansoddiad, yn yr achosion hynny lle roddwyd mwy o wybodaeth am y maes hwn yn yr Adolygiad Blynyddol, 24% yn unig o'r Adroddiadau Blynyddol a gynhwysai croesgyfeiriad at y deunydd perthnasol.

Gwariant

Yn ôl ein dadansoddiad o'r elusennau, cafwyd tri phrif fath o wariant elusennol. Gwariwyd ar:

- Ddarparu gwasanaethu (e.e. gofal/cynghori) (47%).
- Ddarparu cymorth ariannol (e.e. rhoi grantiau i unigolion a/neu sefydliadau (20%).
- Ddarparu adeiladau/cyfleusterau/llecynnau agored (20%).

Cafwyd nodiadau cynhwysfawr i'r Cyfrifon gan y mwyafrif o'r elusennau, yn esbonio eu prif dreuliau, er bod un neu fwy o'r nodiadau eglurhaol ar goll yn achos 75 o'r elusennau (38%).

Edrychwyd yn fanwl ar sylwadau yn yr Adroddiadau Blynyddol am eitemau ariannol anghyffredin megis diffyg ariannol sylweddol mewn cynllun pensiwn budd-dal diffiniedig, costau ad-drefnu sylweddol a/neu gostau diswyddiad, ac enghreifftiau unigol o wariant elusennol sylweddol. O blith y 148 elusen a oedd i'w gweld yn cynnwys eitemau o'r fath:

- Rhoddodd 46 (31%) o'r Adroddiadau Blynyddol fanylion sylweddol er mwyn esbonio'r materion hyn.
- Rhoddodd 32 (22%) rywfaint o fanylion.
- Ni chafwyd unrhyw fanylion o gwbl gan 70 (47%).

Mewn cyferbyniad, roedd canran uwch o lawer o'r Adolygiadau Blynyddol yn cynnwys gwybodaeth am faterion ariannol:

- Rhoddodd 60% o'r Adolygiadau Blynyddol ffigurau pennawd na chynhwyswyd yn yr Adroddiad Blynyddol.
- Rhoddodd 35% gymarebau ariannol na chynhwyswyd yn yr Adroddiad Blynyddol.
- Rhoddodd 78% wybodaeth ariannol grynodedig.

Gyda golwg ar yr elusennau a arolygwyd, £7bn oedd cyfanswm yr adnoddau a ddefnyddiwyd ar gyfer y flwyddyn yn gorffen 31 Mawrth 2003. Mae'n bwysig iawn bod yr ymddiriedolwyr yn atebol am y modd y gwerir yr arian hwnnw.

Gweithgareddau a chyflawniadau

Effaith

Mae gweithgareddau elusen o ddiddordeb mawr i fudd-ddeiliaid gan eu bod yn dangos pa mor effeithiol yw'r defnydd a wneir o adnoddau'r elusen er budd y cyhoedd.

- Rhoddodd 16% o'r Adroddiadau Blynyddol esboniad manwl o'r modd y bu gweithgareddau'r flwyddyn o fudd i'r cyhoedd yn gyffredinol.
- Rhoddodd 34% rywfaint o wybodaeth.
- Ni roddodd 51% unrhyw fanylion o gwbl.

Pan ddadansoddwyd canlyniadau'r arolwg yn ôl y math o weithgaredd a gyflawnwyd gan yr elusen, gwelwyd bod:

- Yr elusennau Cadwraeth a Gwarchod yn well na'r cyffredin am gyfleu yn eu Hadroddiadau Blynyddol y modd y mae eu gweithgareddau o fudd i'r cyhoedd. Rhoddodd 33% wybodaeth fanwl.

- Nid oedd Adroddiadau Blynyddol unrhyw un o'r 20 elusen Diwylliant, Chwaraeon a Hamdden yn dangos manylion yn esbonio'r modd y mae eu gweithgareddau o fudd i'r cyhoedd.

Mae gofyn bod ymddiriedolwyr elusennau yn ailasesu'n gyson effaith gweithgareddau'r elusen ar gymdeithas, a'r modd y maent o fudd i'r cyhoedd. Mae tystiolaeth i ddangos bod nifer cynyddol o elusennau yn dechrau edrych ar yr agwedd hon o'u gwaith fel mater o drefn ac rydym yn annog elusennau nid yn unig i wneud hyn ond hefyd i adrodd am hyn yn yr Adroddiad Blynyddol. Nid yw adrodd am effaith gweithgareddau elusen yn ofynnol gan y SORP Elusennau, ond mae'n elfen allweddol o arfer da wrth sicrhau tryloywder ac atebolrwydd, ac yn un sy'n haeddu mwy o sylw gan yr elusennau. Nid yw diffyg sylwadau ar effaith yr elusen yn arwydd nad yw'r ymddiriedolwyr yn ystyried y mater, ond gall roi'r argraff hynny i fudd-ddeiliaid.

Enghraifft o arfer da:

Yn achos un o'r elusennau a adolygwyd, darparwyd "Adroddiad am Effaith" manwl a llawn gwybodaeth fel rhan o'i Hadroddiad Blynyddol a Chyfrifon. Rhoddwyd manylion am amcanion strategol yr elusen, a gyflwynwyd yn yr adroddiad fel mesurau a thargedau effaith y gallai'r budd-ddeiliaid eu defnyddio wrth ystyried perfformiad yr elusen yn ystod y flwyddyn a fu.

Cyflawniadau yn erbyn targedau

Mae'r mwyafrif o elusennau yn gosod targedau ar gyfer y flwyddyn gyda golwg ar arian neu weithgareddau. Mae monitro cyflawniadau yn erbyn y targedau hyn ac adrodd am gynnydd a gwelliannau yn elfen bwysig o atebolrwydd sy'n caniatáu i'r sawl sydd â diddordeb fesur llwyddiant yr elusen.

- Rhoddodd 30 elusen (15%) ddigon o fanylion yn eu Hadroddiadau Blynyddol yn dangos i ba raddau yr oedd eu cyflawniadau yn cyfateb i'w cynlluniau.

- Rhoddodd 88 (44%) rywfaint o wybodaeth.
- Ni chafwyd unrhyw fanylion o gwbl gan 82 (41%).

Cafwyd un eithriad sylweddol i'r uchod. Un elusen Diwylliant, Chwaraeon a Hamdden yn unig o blith 20 a roddodd manylion sylweddol yn dangos i ba raddau yr oedd ei chyflawniadau yn cyfateb i'w chynlluniau.

Gweithgareddau a chyflawniadau

Cyflawniadau cronfeydd wrth gefn a thargedau polisiâu buddsoddi

- Rhoddodd 80% o'r Adroddiadau Blynyddol rywfaifnt o fanylion am berfformiad yn erbyn polisi cronfeydd wrth gefn, ond ni chafwyd manylion gan 20%.
- Roedd 83 o'r 178 Adroddiad Blynyddol a gyflwynwyd gan elusennau gyda buddsoddiadau yn cynnwys rhai sylwadau ar berfformiad buddsoddiadau yn erbyn targedau, ond ni chafwyd sylwadau o gwbl gan 95 (53%).

Yr ydym yn ymwybodol bod y ddwy flynedd diwethaf wedi bod yn anodd o safbwynt y marchnadoedd buddsoddi, ond nid yw hyn yn cyfiawnhau lleihau'r lefel o dryloywder ac atebolrwydd drwy fethu â rhoi datganiad o bolisi a datganiad o berfformiad yn ei erbyn.

Nid yw adrodd am berfformiad yn erbyn targedau polisi cronfeydd wrth gefn yn ofynnol gan y SORP Elusennau ond mae'n agwedd bwysig ar atebolrwydd, ac mae lle i wella yn y maes hwn. Gall yr Adroddiad Blynyddol roi golwg cyffredinol gan gyfeirio at fanylion sy'n ymddangos mewn man arall; mae croesyfeirio at ffynonellau sy'n cynnwys mwy o wybodaeth yn arfer da.

Cyflawniadau Is-gwmnïau

Mae'r SORP Elusennau yn gofyn bod elusennau yn gwneud sylwadau ar weithgareddau a chyflawniadau eu his-gwmnïau. Methodd nifer o Adroddiadau Blynyddol â gwneud hynny.

Rhaid i ymddiriedolwyr fod yn atebol am bob rhan o waith yr elusen; os na cheir adroddiad am weithgareddau is-gwmni, ni fydd budd-ddeiliaid yn derbyn gwybodaeth am agwedd ar weithgareddau'r elusen a allai fod yn bwysig.

Yn unol ag arfer da, dylai ymddiriedolwyr:

- Sicrhau bod eu Hadroddiad Blynyddol yn cydymffurfio â gofynion eu SORP Elusennau drwy gynnwys digon o wybodaeth am weithgareddau a chyflawniadau'r elusen, ac yna ehangu'r wybodaeth neu gynnwys croesyfeiriadau da at y manau hynny lle ceir hyd i fanylion ychwanegol.
- Sicrhau bod eu hadroddiad am gyflawniadau yn cynnwys gwaith eu his-gwmni pan fo hynny'n berthnasol.
- Gofio bod nifer o'u budd-ddeiliaid yn amhrofiadol o ran dadansoddi Cyfrifon, ac y byddant yn troi at yr ymddiriedolwyr am esboniad o'r ffigurau. Dylid cynnwys esboniad o'r fath yn yr Adroddiad Blynyddol, yn ôl gofyniad y SORP Elusennau; pan ymhelaethir ar yr wybodaeth yn yr Adolygiad Blynyddol, dylid cynnwys croesyfeiriad priodol.
- Ddangos yn eu Hadroddiad Blynyddol eu bod wedi ystyried effaith waith yr elusen wrth adolygu ei strategaeth.
- Ddatgelu manylion, yn eu Hadroddiad Blynyddol, yn dangos y targedau allweddol a osodwyd ar gyfer y flwyddyn a pherfformiad yr elusen yn erbyn y targedau hyn.

Enghraifft eglurhaol:

Yn achos un o'r elusennau a ddewiswyd ar gyfer ymweliad adolygu, ni ofalwyd bod digon o wybodaeth ar gael i'r cyhoedd am ei hamcanion a'i gweithgareddau. O ganlyniad, caed yr argraff nad oedd yr elusen, o bosib, yn gweithredu'n effeithiol.

Daeth yn amlwg, yn ystod yr ymweliad, bod yr elusen yn sefydliad gweithredol a dynamig iawn, ac nad oedd wedi llwyddo i gyfleu hyn i'w budd-ddeiliaid, gan gynnwys y Comisiwn Elusennau.

Cynghorwyd yr ymddiriedolwyr gan staff y Comisiwn Elusennau i sicrhau bod gwybodaeth am sail resymegol yr elusen, y modd y mae'n gweithredu a'i llwyddiannau ar gael drwy gyfrwng ei Hadroddiad Blynyddol, ei gwefan a dogfennau eraill er mwyn cynyddu dealltwriaeth y cyhoedd o'i gwaith.

Yn yr achos hwn, tanseiliwyd gwaith elusen drefnus ac effeithiol gan ei methiant i fod yn gwbl atebol i'w budd-ddeiliaid.

Yn gyson, mae ein rhaglen ymweliadau adolygu yn dod ar draws nifer o elusennau sydd wedi dangos lefelau da o dryloywder mewn sawl ffordd, megis drwy gyfrwng Adroddiad y Cadeirydd sy'n fanwl ac yn llawn gwybodaeth, ond sydd wedi methu â chydymffurfio â rhai o ofynion sylfaenol y SORP Elusennau.

Dylai ymddiriedolwyr gynnwys manylion am y modd y mae gweithgareddau a chyflawniadau'r elusen o fudd i'r cyhoedd yn eu Hadroddiad Blynyddol. Mae dangos ym mha ffordd y mae'r elusen o fudd i'r cyhoedd yn elfen allweddol o atebolrwydd.

Strwythur a phrosesau cyfundrefnol

Mae gallu elusen i roi gwasanaeth effeithiol yn dibynnu ar gryfder ei strwythurau rheoli a'i phrif brosesau mewnol. Mae gallu budd-ddeiliaid i ddarganfod, o ddarllen yr Adroddiad Blynyddol, pwy yw'r ymddiriedolwyr, eu dull o drefnu'r elusen a'r prif brosesau a ddefnyddir i'w rhedeg, yn rhan allweddol o dryloywder ac atebolrwydd. Mae'r bennod hon yn adolygu lefelau datgelu'r elusen gyda golwg ar y strwythurau a'r prosesau hyn.

Manylion am ymddiriedolwyr a phwyllgorau

Mae'r SORP Elusennau yn gofyn bod ymddiriedolwyr yn darparu "disgrifiad o strwythur cyfundrefnol yr elusen a'r modd y gwneir penderfyniadau".

Pwy yw'r ymddiriedolwyr?

Mae'r SORP Elusennau yn gofyn bod pob elusen yn cynnwys, yn ei Hadroddiad Blynyddol, enwau'r ymddiriedolwyr ar adeg llofnodi'r adroddiad ac yn ystod y flwyddyn ariannol y cyfeirir ati yn yr Adroddiad. Yn ogystal, mae'n gofyn am ddatgelu manylion eraill am yr ymddiriedolwyr, yn bennaf yn ymwneud â'r dull o'u hapwyntio, a'r sawl sy'n gyfrifol am wneud hynny.

Aelodau'r cwmni elusennol sy'n gyfrifol am apwyntio'i hymddiriedolwyr. Mewn rhai achosion, gall fod mai'r un bobl yw'r ymddiriedolwyr a'r aelodau. Er mwyn cynyddu tryloywder, dylai'r Adroddiad Blynyddol ddangos yn glir y modd yr apwyntir yr ymddiriedolwyr a chynnwys manylion llawn am y broses.

Dirprwyaeth i bwyllgorau

Mae nifer o fyrddau ymddiriedolwyr, yn enwedig yn achos yr elusennau mwy o faint, yn dirprwyo rhai o'u swyddogaethau i bwyllgorau. Gall y dull hwn o weithio fod yn effeithiol iawn: mae'n golygu bod mwy o amser yn cael ei roi i faterion a ddirprwyir i'r pwyllgor ac yn caniatáu i'r sawl nad ydynt yn ymddiriedolwyr gymryd rhan yn y broses, gan sicrhau ystod ehangach o arbenigedd wrth wneud penderfyniadau.

Dylai budd-ddeiliaid fedru canfod pa benderfyniadau a ddirprwyir ac i bwy er mwyn gallu deall sut y gwneir penderfyniadau.

Tâl a threuliau

Fel arfer, ni thelir ymddiriedolwyr oni bai fod y ddogfen lywodraethol yn caniatáu hynny neu fod y Comisiwn Elusennau wedi caniatáu hynny o flaen llaw. Mae'r SORP Elusennau yn gofyn bod unrhyw daliadau i ymddiriedolwyr yn cael eu datgelu a bod natur a chyfanswm treuliau a ad-dalwyd i ymddiriedolwyr yn cael eu cynnwys yn nodiadau i'r Cyfrifon.

Yn ogystal, rhaid cadarnhau nad yw'r ymddiriedolwyr wedi cael eu talu neu na chafodd unrhyw dreuliau eu had-dalu.

- 3 yn unig o blith y 200 elusen a fethodd â chynnwys y manylion gofynnol yn ymwneud â phwy oedd yr ymddiriedolwyr ar adeg llofnodi'r Adroddiad Blynyddol a thrwy gydol y flwyddyn ariannol.

Strwythur a phrosesau cyfundrefnol

- Rhoddodd 39% fanylion llawn am y broses o apwyntio'r ymddiriedolwyr a rhoddodd 40% rywfaint o wybodaeth.
- Ni roddodd 22% unrhyw fanylion o gwbl am y broses o apwyntio ymddiriedolwyr.
- Rhoddodd 53% manylion o ryw fath am eu pwyllgorau.

Os rhoddir gwybodaeth annigonol am y meysydd hyn, ni fydd budd-ddeiliaid yn gwybod pwy sy'n atebol yn y pen draw am weithgareddau'r elusen. Mae hyn yn allweddol o safbwynt tryloywder, ac felly nid yw'r ffigur o 22%, sef y ganran o elusennau na roddodd unrhyw wybodaeth ynghylch apwyntio ymddiriedolwyr, yn dderbyniol.

- Darparodd 94% o'r elusennau, yn eu Hadroddiadau Blynyddol, yr wybodaeth ofynnol am daliadau a wnaed i ymddiriedolwyr ac ad-daliadau treuliau.
- Ychydig iawn ohonynt a ddatganodd na wnaed unrhyw daliadau o gwbl.

Mae'n dda i wybod bod y mwyafrif o elusennau wedi darparu'r wybodaeth ofynnol ynghylch taliadau. Hoffem weld mwy o elusennau yn gwneud mwy na'r isafswm gofynnol er mwyn rhoi gwybodaeth glir am unrhyw daliadau ac ad-daliadau a wnaed i ymddiriedolwyr.

Strwythur cyfundrefnol

Strwythurau mewnlol

Er mwyn gwneud penderfyniadau ynghylch sadrwydd trefniadaeth elusen, rhaid i fudd-ddeiliaid fedru gweld manylion yn ymwneud â'i strwythur (gweithgareddau, rhaniadau ac adrannau) a'r prif weithredwr a'r swyddogion gweithredol hyn sy'n gofalu am bob gweithgaredd/adran/rhaniad. Rhaid i

fudd ddeiliaid gael yr wybodaeth hon er mwyn gweld, er enghraifft, a yw elusen yn cael ei gweinyddu mewn ffordd effeithiol neu fiwrocrataidd.

- Cyflwynodd 37% o'r Adroddiadau Blynyddol fanylion da am strwythur cyfundrefnol yr elusen.
- Rhoddodd 56% rywfaint o fanylion.
- Drwy beidio â chynnwys unrhyw fanylion o gwbl, methodd 8% â chydymffurfio â gofynion y SORP Elusennau.
- Ychydig iawn o'r elusennau a roddodd unrhyw fanylion ychwanegol am eu swyddogion gweithredol hyn, e.e. eu cefndir a'u cymwysterau.


Strwythur grŵp

Yn aml, mae perfformiad is-gwmni'n elfen bwysig o berfformiad yr elusen gyfan. Mae'r Ymddiriedolwyr yn gyfrifol am weithredu pob un o'r sefydliadau o fewn y grŵp, ac felly dylai'r Adroddiad Blynyddol:

- ddisgrifio'r strwythur grŵp;
- ddisgrifio strwythurau mewnlol yr elusen;
- esbonio diben pob un o'r prif is-gwmnïau.

Mae'r SORP Elusennau, Safonau Adrodd Ariannol (a'r Ddeddf Cwmnïau, lle bo hynny'n berthnasol) yn mynnu bod gwybodaeth gryno am yr is-gwmnïau yn cael ei datgelu yn y Cyfrifon. Fodd bynnag, mae'r SORP Elusennau yn gofyn bod yr Adroddiad Blynyddol yn gwneud sylwadau ar weithgareddau'r is-gwmnïau yn ystod y flwyddyn. Roedd prif incwm 76 (38%) o'r elusennau a ddadansoddwyd yn deillio o fasnachu, sy'n digwydd drwy gyfrwng is-gwmnïau fel rheol. Roedd gan 140 o'r 200 elusen a ddadansoddwyd is-gwmnïau neu gwmnïau cysylltiedig.

Gwybodaeth am is-gwmnïau a gyflwynwyd yn Adroddiadau Blynyddol yr elusennau



- Adroddiad Blynyddol yn cynnwys llawer o fanylion sy'n rhwydd eu canfod (20%)
- Adroddiad Blynyddol yn cynnwys rhywfaint o wybodaeth (11%)
- Adroddiad Blynyddol yn cynnwys dim ond ychydig o fanylion (12%)
- Adroddiad Blynyddol yn cynnwys dim manylion o gwbl (28%)
- Amherthnasol Nid oes gan yr Elusen is-gwmni (29%)

Sail: 200

Partneriaethau â sefydliadau eraill

Yn aml bydd elusennau yn gweithio mewn partneriaeth ag elusennau eraill a sefydliadau o fathau eraill er mwyn cynnal eu gweithgaredd elusennol. Gall fod yr elusennau a'r sefydliadau hyn yn perthyn i gategori partïon perthynol (fel y'i diffinnir yn y SORP Elusennau a'r Safon Adrodd Ariannol 8). Er mwyn sicrhau tryloywder wrth ddisgrifio strwythur elusen dylai ymddiriedolwyr roi gwybodaeth am bob partneriaeth sylweddol a threfniadau â

sefydliadau eraill - nid yn unig yr agweddau ariannol ond hefyd y sail resymegol, gweithgareddau a chyflawniadau sy'n helpu'r elusen i hyrwyddo ei hamcanion. Roedd ein canlyniadau yn dangos bod:

- 25% o'r Adroddiadau Blynyddol yn rhoi llawer o fanylion am berthynas yr elusennau â sefydliadau eraill, lle bo berthynas o'r fath yn bodoli.
- 88% yn rhoi llawer o fanylion amdanynt yn y nodiadau i'r Cyfrifon.

Rheoli risg

Mae manylion am reoli risg yn agweddau pwysig ar dryloywder ac atebolrwydd. Dylai budd-ddeiliaid fedru gweld, o ddarllen yr Adroddiad Blynyddol, bod yr elusen wedi adnabod a cheisio atal pob elfen o risg.

Mae'r SORP Elusennau yn gofyn bod ymddiriedolwyr yn gwneud datganiad am risg yn eu Hadroddiad Blynyddol. Mae nifer o elusennau yn gwneud hyn, ond yn rhoi'r argraff eu bod yn gwneud hynny dan orfodaeth, yn lle ategu eu datganiad drwy ddangos eu bod wedi dilyn proses trylwyr.

- Rhoddodd 74% (147) o'r 200 elusen y datganiad gofynnol am risg a gwnaed datganiad gan 46 o'r gweddill a oedd yn cwrdd â rhai, ond nid y cyfan, o'r gofynion.
- Drwy fethu â gwneud unrhyw ddatganiad o gwbl, methodd 4% (7) elusen â chydymffurfio â'r SORP Elusennau.
- Aeth 48% ymhellach na rhoi'r datganiad sylfaenol yn unig, drwy gynnwys manylion ychwanegol da am y prosesau a ddefnyddir er mwyn adnabod, monitro a rheoli risg.
- Rhoddodd 8% esboniad manwl o natur rhai o'r prif risgiau a wynebent.
- Gwnaeth 24% sylwadau ar drefniadau TG yr elusen.

Mae elusennau'n dibynnu'n fwyfwy ar TG, ac felly maent yn wynebu risgiau mawr os nad yw'n gweithredu'n effeithiol. Gellir gwella lefel atebolrwydd drwy roi manylion am brif systemau TG yr elusen i fudd-ddeiliaid.

Wrth ddadansoddi'r canfyddiadau yn ôl categorïau elusennau, gwelwyd bod elusen Tai a Materion Cymunedol yn rhoi datganiadau pellach gwell na'r cyffredin ynghylch rheoli risg. Cafwyd manylion da gan 65% ohonynt am y dulliau a ddefnyddir i fonitro a rheoli risgiau mawr (cyfartaledd trwodd a thro o 47%). Y rheswm am hyn, mae'n debyg, yw'r ffaith bod 16 o'r 28 elusennau hyn yn Landlordiaid Cymdeithasol Cofrestredig, ac felly yn rhwym o wneud datganiad manylach o lawer am reolaeth fewnol yn ôl gofynion y SORP RSL na'r hyn sy'n ofynnol gan y SORP Elusennau.

Canfuwyd bod y sylwadau ar strwythur cyfundrefnol, ac ar is-sefydliadau a sefydliadau perthynol yn benodol, yn annigonol. Mae llawer o le i wella er mwyn rhoi darlun clir i'r budd-ddeiliaid o'r ffordd y mae'r elusennau hyn yn gweithredu.

Yn unol ag arfer da, dylai'r ymddiriedolwyr:

- Ystyried a fyddai darparu manylion am uwch-reolwyr ac ymddiriedolwyr megis eu cymwysterau, cyfnodau fel cyfarwyddwr neu ymddiriedolaethau eraill a maes eu harbenigedd o ddefnydd i'r budd-ddeiliaid.
- Sicrhau bod yr Adroddiad Blynyddol bob amser yn cynnwys manylion am y modd yr apwyntir ymddiriedolwyr, yn ôl gofynion y Ddeddf Elusennau a'r SORP Elusennau.
- Roi manylion am strwythur cyfundrefnol, gan gynnwys is-gwmniau.

Datgelu strategaeth, polisiau a chynlluniau

Dylai'r Adroddiad Blynyddol ddangos yn glir sut y troir amcanion elusennol yn weithredoedd. Fel rheol mynegir amcanion cyfreithiol elusen mewn termau cyffredinol iawn ac yn aml nid yw'n bosibl i ymddiriedolwyr ymgymryd â'r ystod cyfan o weithgareddau a ganiateir ganddynt. Mae penderfynu pa weithgareddau penodol y bydd yr elusen yn ymgymryd â nhw a pha adnoddau sydd ar gael i wneud hynny yn elfen bwysig iawn o gyfrifoldeb yr ymddiriedolwyr.

Mae'r bennod hon yn canolbwyntio ar ddatgeliadau elusennau am eu strategaethau, eu polisiau a'u cynlluniau i gyflawni eu hamcanion elusennol.

Strategaeth a chynlluniau

Mae darparu gwybodaeth am strategaeth yr elusen, sy'n crynhoi'r meysydd gweithgaredd penodol y mae'r elusen yn canolbwyntio arnynt o fewn fframwaith ei hamcanion yn elfen allweddol o ddangos atebolrwydd i fudd-ddeiliaid.

Nid yw'r SORP Elusennau yn gofyn yn benodol am ddatgeliadau o strategaeth elusennau yn yr Adroddiadau Blynyddol; mae'n mynnu datgeliad o fanylion am weithgareddau a gynhaliwyd yn ystod y flwyddyn yng nghyd-destun y strategaeth. Fodd bynnag, mae nifer o elusennau yn cynnwys manylion o'r strategaeth gyfredol neu'r datganiad o genhadaeth (neu'r ddau), yn eu Hadroddiad Blynyddol, gan asesu, yn ogystal, i ba raddau y mae eu gweithgareddau wedi cwrdd â'u hamcanion.

Mae'r SORP Elusennau yn gofyn bod yr Adolygiad Blynyddol yn cynnwys sylwadau ar gynlluniau ar gyfer dyfodol yr elusen. Yn aml, bydd ymddiriedolwyr yn mynd gam ymhellach drwy gynnwys sylwadau ar sefyllfa ariannol yr elusen yn yr Adroddiad Blynyddol.

- Rhoddodd 66 o'r Adroddiadau Blynyddol a ddadansoddwyd (33%) fanylion da am gynlluniau ar gyfer y dyfodol.
- Rhoddodd 105 (53%) rywfaent o fanylion.
- Drwy fethu â rhoi unrhyw wybodaeth o gwbl, methodd 29 (15%) â chwrdd â lleiafswm gofynion y SORP Elusennau ynglŷn â datgeliadau.
- Rhoddodd 61 (31%) fanylion am sefyllfa ariannol yr elusen.

Mae'n well gan elusennau ddatgelu'r math yma o fanylion yn yr Adolygiadau Blynyddol, sy'n esbonio, i raddau, pam na cheir hyd i'r wybodaeth yn yr Adroddiadau.

- Roedd 59 o'r Adolygiadau Blynyddol a ddadansoddwyd (71% o'r Adolygiadau a oedd ar gael) yn cynnwys sylwadau am y dyfodol oedd yn ychwanegol at yr wybodaeth a gyflwynwyd yn yr Adroddiad Blynyddol.

Rhoddodd mwy o elusennau Gwasanaethau a Gofal Cymdeithasol a Chrefyddol fanylion da am gynlluniau at y dyfodol yn eu Hadroddiadau Blynyddol (50% a 42% yn ôl eu trefn) na'r cyfartaledd o 33%. 8% yn unig o elusennau Addysg, Hyfforddi ac Ymchwil Wyddonol a roddodd fanylion da am gynlluniau ar gyfer y dyfodol yn eu Hadroddiadau Blynyddol ond gwnaed yn iawn am hyn drwy gynnwys mwy o ddatgeliadau na'r cyfartaledd (89%) yn eu Hadolygiadau Blynyddol.

Mae'n bwysig i ddatgan cynlluniau'r elusen er mwyn caniatáu i fudd-ddeiliaid weld ym mha fodd y bydd yr elusen yn parhau i weithredu. Methodd gormod o'r elusennau â rhoi'r wybodaeth hon ac o ganlyniad, methwyd â chydymffurfio â gofynion y SORP Elusennau ac i sicrhau tryloywder a fydd yn caniatáu i fudd-ddeiliaid ddeall sefyllfa'r elusen. Mae'n arfer da i gynnwys manylion pellach yn yr Adolygiad Blynyddol ond nid i

ddefnyddio'r Adolygiad Blynyddol fel cyfrwng i gyfleu gwybodaeth y mae gofyn ei chynnwys yn yr Adroddiad Blynyddol. Pan gyflwynir gwybodaeth ychwanegol yn yr Adolygiad Blynyddol, dylid cynnwys croesgyfeiriadau priodol yn yr Adolygiad Blynyddol.

Polisiau

Yr ymddiriedolwyr sy'n penderfynu pa bolisiau allweddol a ddilyni'r er mwyn i'r elusen fedru cyflawni ei hamcanion. Wrth ddatgelu'r wybodaeth hon yn yr Adroddiad Blynyddol mae'r elusen yn cadarnhau ei bod yn atebol i'r budd-ddeiliaid drwy ddangos iddynt sut y mae'r ymddiriedolwyr yn bwriadu sicrhau adnoddau a'u defnyddio yn y dyfodol.

Cronfeydd wrth gefn

- Cafwyd esboniad da gan 66% o'r 200 elusen ynglŷn â'u polisi cronfeydd wrth gefn.
- Ni chyfeiriodd 10% at y polisi o gwbl.
- Rhoddodd 39% esboniad da o'u perfformiad gwirioneddol yn erbyn eu polisi cronfeydd wrth gefn ac o'r camau y byddent yn eu cymryd i gysoni'r perfformiad â'r polisi.

Rhoddodd 42% o elusennau Tai a Materion Cymunedol fanylion da am eu polisiau cronfeydd wrth gefn - 24% yn llai na'r ffigur cyfartalog ar gyfer y 200 elusen i gyd.

Mae'r elusennau hynny na chyfeiriodd at bolisi o gwbl yn torri amodau'r SORP Elusennau, yn ogystal â gofynion Rheoliadau'r Elusennau (Adroddiadau a Chyfrifon) 2000, yn achos yr elusennau hynny nad ydynt yn gwmnïau cyfyngedig

£5.9bn. oedd cyfanswm cronfeydd wrth gefn (heb gynnwys gwaddolion) yr elusennau a ddadansoddwyd ar 31 Mawrth 2003, ac roedd eu "cronfeydd rhydd" yn £0.9bn. Dylai'r elusennau fod yn gwbl atebol am y swm sylweddol hwn. Nid yw'n dderbyniol bod unrhyw un o'r elusennau a ddadansoddwyd yn methu â rhoi manylion am eu polisi cronfeydd wrth gefn. Rydym yn annog mwy o elusennau i ddilyn esiampl y 38% a roddodd manylion llawn am eu polisi a'u perfformiad yn ei erbyn.

Mae cyhoeddiadau'r Comisiwn Elusennau, **Charity Reserves (RS3)** a **Charity Reserves (CC19)**, yn rhoi mwy o wybodaeth am gronfeydd wrth gefn, a'u pwrpas yw gwella safon adrodd yn y maes hwn.

Buddsoddiadau

Lle bo hynny'n berthnasol, mae'r SORP Elusennau yn gofyn bod elusen yn datgan ei phwerau buddsoddi yn yr Adroddiad Blynyddol.

- Rhoddodd 41 o blith y 200 (21%) elusen ddatganiad am eu pwerau buddsoddi yn eu Hadroddiad Blynyddol.
- Rhoddodd 70 (35%) esboniad o'u polisi buddsoddi.

Nid yw'n dderbyniol bod cynifer o elusennau o'r maint hwn, a all fod yn gyfrifol am adnoddau a buddsoddiadau sylweddol, yn methu â chydymffurfio â gofynion y SORP Elusennau.

Grantiau taladwy

Lle bo hynny'n berthnasol, mae'r SORP Elusennau yn gofyn bod elusen yn datgan ei pholisi ynglŷn â rhoi grantiau Dylai'r

ymddiriedolwyr roi mwy na'r lleiafswm gofynnol o wybodaeth am y maes hwn, yn enwedig pan fo rhoi grantiau yn rhan sylweddol o wariant yr elusen. Mae rhoi manylion llawn am bolisi'r elusen ynglŷn â rhoi grantiau yn caniatáu i fudd-ddeiliaid ddeall sut y mae'r elusen yn gwario'i harian ac yn gwneud penderfyniadau ynglŷn â hynny.

- Roedd 148 o'r 200 elusen (74%) yn rhoi grantiau i'w budd-ddeiliaid.
- Rhoddodd 33 o'r 148 fanylion da am eu polisi ynglŷn â rhoi grantiau yn yr Adroddiad Blynyddol (22%), a rhoddodd 18 o'r gweddill (12%) rywffaint o fanylion.
- Ni chafwyd unrhyw fanylion o gwbl gan 97 o'r 148 (66%).

Mae'r ffaith bod 66% o elusennau sy'n rhoi grantiau wedi methu â rhoi unrhyw fanylion o gwbl am eu polisi yn siomedig. Mae'r SORP Elusennau yn gofyn bod polisiâu o'r fath yn cael eu datgelu, ac y mae hefyd yn rhan allweddol o dryloywder ac atebolrwydd. Roedd rhoi grantiau yn cyfrif am wariant 40 o'r elusennau, ond methodd 12 ohonynt (30%) â rhoi unrhyw fanylion am eu polisi ynglŷn â rhoi grantiau yn eu Hadroddiad Blynyddol a Chyfrifon.

Chwiliwyd Adolygiad Blynyddol a gwefan yr elusennau hyn (lle bo hynny'n berthnasol) am wybodaeth ychwanegol.¹⁸

Roedd yr wybodaeth ychwanegol a ddarparwyd yn amrywio o ddadansoddiad manwl o'r grantiau a roddwyd a'r polisi ynglŷn â hynny i ffigurau a ffeithiau mwy cyffredinol. Rhoddodd dwy o'r elusennau fanylion da neu ragorol am eu polisi rhoi grantiau. Rhoddodd pum rhywfaint o fanylion am eu rhaglen, ac ni chafwyd unrhyw fanylion o gwbl gan y pump arall. Cyflwynwyd yr wybodaeth ar ffurf tablau neu raffiau yn bennaf.

Tair yn unig o blith y 12 elusen a roddodd groesgyfeiriadau o'u Hadroddiad Blynyddol i'w Hadolygiad Blynyddol neu'r gwefan, ffigur a oedd yn gyson â'r grŵp sampl gyflawn o 200.

Dylai'r 40 elusen a wariar mwyafrif o'u harian ar roi grantiau roi gwell adroddiad o lawer o'r modd y rhannwyd yr arian hwn. Gan mai rhoi grantiau yw prif ffocws eu gweithrediadau, nid ydynt yn dangos tryloywder nac atebolrwydd os nad ydynt yn esbonio'u polisi i'w budd-ddeiliaid.

Polisiau Cyfrifo

Mae'r SORP Elusennau, y Safonau Adrodd Ariannol, y Ddeddf Elusennau a'r Rheoliadau a'r Ddeddf Cwmnïau oll yn mynnu bod elusennau yn datgelu eu polisiâu cyfrifo. Dylai'r Adroddiad Blynyddol ddangos i fudd-ddeiliaid bod yr ymddiriedolwyr wedi adolygu polisiâu cyfrifo'r elusen i sicrhau eu priodoldeb a'u bod yn adlewyrchu amgylchiadau cyfredol yr elusen a'i hanghenion allanol diweddaraf.¹⁹

¹⁸ Nid oedd gan 3 o'r elusennau wefan ac nid oeddent yn darparu Adolygiad Blynyddol.

¹⁹ Mae canfyddiadau ein dadansoddiad yn adleisio canfyddiadau'r Grŵp Cyfarwyddwyr Cyllid Elusennau, sy'n datgan yn ei adroddiad "Inputs matter - improving the quality of reporting in the charity sector":

"Dylai elusennau wneud datgeliadau cliriach a llawnach am eu polisiâu cyfrifo, eu technegau amcangyfrif a seiliau dyraniad / dosraniad eu costau, yn enwedig costau canolog, ar draws llinellau'r Datganiad o Weithgareddau Ariannol (SoFA). Dylid cynnwys nodiadau manwl yn y cyfrifon, i ddangos sut y gweithredwyd y polisiâu a ddatganwyd."

- Yn achos 25% o'r elusennau, roedd mwy nag un polisi cyfrifo pwysig yn eisiau o'u Hadroddiad Blynyddol. Y rhai mwyaf cyffredin oedd:
 - incwm o weithgareddau i hyrwyddo'r amcanion elusennol;
 - ffioedd a grantiau derbyniadwy;
 - gwariant elusennol; a
 - dyrannu costau anuniongyrchol dan benawdau gwariant.
- Gwnaeth 14% sylwadau yn eu Hadroddiad Blynyddol i ddangos a fu unrhyw newidiadau i'r polisiau cyfrifo.
- Fel rheol, yn achos yr elusennau hynny a gyflwynodd gyfrifau cyfunol, ni chyfeiriwyd at eitemau yn y SoFA yn ymwneud â'r is-gwmnïau. Rhaid gwneud hynny os yw'r eitemau hynny'n sylweddol.

Prin iawn oedd y problemau a gafwyd wrth ddatgelu polisiau cyfrifo ar gyfer prif eitemau'r mantolenni. Fel rheol, roedd yr eitemau coll yn perthyn i'r SoFA. Dylai ymddiriedolwyr ofalu eu bod yn datgan polisi ynglŷn â dyraniad costau rhwng categorïau gwariant y SoFA.

Nid oedd elusennau Tai a Materion Cymunedol yn dda am ddatgelu'r pwerau a'r polisiau hyn (14% a 18% yn ôl eu trefn), ac felly hefyd elusennau Iechyd a Meddygol (14% a 29% yn ôl eu trefn). Roedd elusennau sy'n Gweithio Dramor yn well (25% a 50% yn ôl eu trefn) ac roedd elusennau Crefyddol yn well o lawer na'r cyffredin (33% a 67% yn ôl eu trefn).

Mae datgelu polisiau cyfrifol yn rhan allweddol o dryloywder ac atebolrwydd. Mae'n hanfodol bwysig bod budd-ddeiliaid yn derbyn gwybodaeth ariannol am elusen, o gofio bod yr ymddiriedolwyr yn gyfrifol iddynt am warchod asedau'r elusen a gwario'i hadnoddau. Mae lle i wella yn y maes hwn. Er mor galonogol yw gweld bod rhai elusennau yn darparu gwybodaeth am newidiadau i'r polisiau cyfrifo, ni fyddem yn disgwyl gweld bod gwybodaeth statudol yn eisiau o Adroddiadau Blynyddol chwarter yr holl elusennau o'r maint hwn.

Yn unol ag arfer da, dylai ymddiriedolwyr:

- Ddatgan eu pwerau buddsoddi yn eu Hadroddiad Blynyddol, hyd yn oed pan nad oes ganddynt unrhyw fuddsoddiadau neu bolisi buddsoddi.

Datgelu strategaeth, polisiau a chynlluniau

- Wneud datganiad yn eu Hadroddiad Blynyddol yn dangos eu bod wedi adolygu eu polisiau cyfrifo. Mae'r mwyafrif o archwilwyr yn gofyn am ddatganiad gan yr ymddiriedolwyr i gadarnhau eu bod wedi adolygu'r polisiau cyfrifo, ac felly ni ddylai rhyddhau'r wybodaeth hon i fudd-ddeiliaid greu unrhyw anawsterau.
- Gynnwys sylw am sefyllfa ariannol yr elusen yn gyffredinol, sy'n arbennig o ddefnyddiol pan gyplysir ef â manylion o'r arian sydd ar gael a'r polisi cronfeydd wrth gefn, gan ei fod yn gymorth i roi cynlluniau'r elusen ar gyfer y dyfodol yn eu cyd-destun.
- Datgelwch brif nodweddion strategaeth gyfredol yr elusen.

Enghreifftiau eglurhaol o ymarfer gorau:

Yn Adroddiad Blynyddol un o'r elusennau sy'n rhoi grantiau cafwyd rhestr hir o'i grantiau, ynghyd ag esboniad manwl o bwrsas pob un a gwybodaeth gefndirol ynglŷn â phob penderfyniad.

Yn ogystal, roedd yr Adroddiad Blynyddol yn cynnwys canllawiau ynglŷn â gwneud cais i'r elusen am gymorth, tystiolaeth bellach o ddealltwriaeth yr ymddiriedolwyr o natur gyhoeddus y ddogfen.

Yn achos elusen arall a fynegodd ei pholisi cronfeydd wrth gefn yn glir, rhoddwyd esboniad defnyddiol o'r cyfrifiad a ddefnyddiwyd.

Atodiad A - Technegau Ymchwil a Chanfyddiadau'r Arolwg

Daeth y data a ddefnyddiwyd yn yr adroddiad hwn o adolygiad o 200 o Adroddiadau Blynyddol, datganiadau ariannol ac Adolygiadau Blynyddol elusennau o faint sylweddol gyda blwyddyn ariannol yn gorffen ar 31 Mawrth 2003.

Yn ogystal, cynhaliodd cwmni ymchwil annibynnol gyfweiliadau â 1000 o aelodau'r cyhoedd i ganfasio eu barn am y lefel a'r math o wybodaeth y mae elusennau yn ei rhyddhau i'w budd-ddeiliaid.

Proffil o'r elusennau a arolygwyd

Tabl 1: Yn ôl y math o elusen

Math o elusen	Offeryn Llywodraethol	Nifer	%
Cwmni cyfyngedig	Memorandwm ac Erthyglau Cwmni	147	74
Corfforedig dan Siartr Frenhinol	Siartr Frenhinol	18	9
Ymddiriedolaeth	Dogfen ymddiriedolaeth	23	11
Ymddiriedolaeth	Sefydlwyd drwy Gynllun y Comisiwn Elusennau	8	4
Ymddiriedolaeth	Sefydlwyd drwy Ddeddf Seneddol	3	2
Ymddiriedolaeth	Sefydlwyd drwy Weithred Newid Enw	1	-
			Sail: 200

Tabl 2: Yn ôl y math o gyfarwyddyd

Math o gyfarwyddyd a ddilynwyd	Nifer	%
SORP Elusennau yn unig	170	85
Cyfarwyddyd NHS a SORP Elusennau	6	3
SORP Landlord Cymdeithasol Cofrestredig	23	12
SORP Addysg Uwch a Phellach	1	1
		Sail: 200

Tabl 3: Yn ôl gweithgaredd

Gweithgaredd	Nifer	%
Busnes a phroffesiynol	0	-
Iawnderau sifil, dinasyddiaeth a chyfraith a threfn	6	3
Cadwraeth a gwarchod	9	5
Diwylliant, chwaraeon a hamdden	20	10
Addysg, hyfforddiant ac ymchwil wyddonol	24	12
Iechyd a meddygol	41	20
Tai a Materion Cymunedol	28	14
Gweithio tramor	12	6
Cyfryngiad dyngarol e.e. rhoi grantiau	4	2
Crefydd	12	6
Gwasanaethau a gofal cymdeithasol	44	22
		Sail: 200

Tabl 4: Yn ôl prif ffynhonnell incwm

Prif ffynhonnell incwm	Nifer	%
Rhoddion, cymynroddion ac incwm tebyg	39	20
Incwm yn deillio o aelodaeth	2	1
Grantiau/ffioedd gan lywodraeth ganolog neu leol	73	37
Incwm yn deillio o fasnach	76	38
Incwm yn deillio o fuddsoddiadau, gan gynnwys llog banc	5	2
Other	5	2
		Sail: 200

Technegau ymchwil a chanfyddiadau'r arolwg

Tabl 5: Yn ôl prif fath o wariant elusennol

Prif fath o wariant	Nifer	%
Yn darparu cymorth ariannol (e.e. rhoi grantiau i unigolion a/neu sefydliadau)	40	20
Yn darparu adeiladau/cyfleusterau/llecynnau agored	39	20
Yn darparu gwasanaethau (e.e. gofal/cynghori)	93	47
Yn darparu eiriolaeth/cyngor/gwybodaeth/addysg	14	7
Yn gweithredu fel sefydliad ambarél/ffynhonnell adnoddau	1	-
Yn noddi neu'n ymgymryd ag ymchwil	13	6
		Sail: 200

Tabl 6: Yn ôl cyflwyniad Adolygiad Blynyddol

	Nifer	%
Adolygiadau Blynyddol ar gael ar gyfer yr astudiaeth hon	83	42
		Sail: 200

Cyflwyno'r Adroddiadau a'r Cyfrifon

Tabl 7: Pryd gyflwynwyd yr Adroddiadau a'r Cyfrifon?

	Derbyniwyd gan y Comisiwn Elusennau		Llofnodwyd a chymeradwywyd gan yr Ymddiriedolwyr	
	Nifer	%	Nifer	%
Mai 2003	-	-	1	-
Mehefin 2003	-	-	16	8
Gorffennaf 2003	6	3	73	37
Awst 2003	8	4	19	9
Medi 2003	21	10	37	19
Hydref 2003	17	9	18	9
Tachwedd 2003	18	9	16	8
Rhagfyr 2003	26	13	9	5
Ionawr 2004	91	45	9	5
Chwefror & Mawrth 2004	13	7	1	-
Dim dyddiad ar lofnod yr Ymddiriedolwyr	-	-	1	-
				Sail: 200

Technegau ymchwil a chanfyddiadau'r arolwg

Tabl 8: Y camau cyn cyflwyno'r Adroddiadau a'r Cyfrifon

	Dyddiau cyfartalog	Cyfnod hiraf	Cyfnod byrraf
Cyfnod o:	Dyddiau	Dyddiau	Dyddiau
• Ddiwedd y flwyddyn ariannol hyd ddyddiad cymeradwyo'r datganiadau ariannol gan yr ymddiriedolwyr	154	308	52
• Gymeradwyaeth yr ymddiriedolwyr hyd ddyddiad llofnodi'r adroddiad gan yr archwilwyr	5	91	0
• Llofnodi'r adroddiad gan yr archwilwyr hyd ddyddiad cyflwyno'r adroddiad a'r cyfrifon i'r Comisiwn	93	234	3
Cyfanswm dyddiau (uchafswm cyfreithiol 306)	253		

* Ni chynhwyswyd elusennau na chyflwynodd gyfrifon wedi'u llofnodi

Yr Adroddiad Blynyddol

Tabl 9: Cyflwyniad yr Adroddiadau Blynyddol

	Ydy Nifer	%	Nac ydy Nifer	%
A ydy'r Adolygiad Blynyddol yn rhwydd ei ddarllen a'i ddefnyddio?	191	96	9	5
A ydy'r Adolygiad Blynyddol yn cynnwys y canlynol:				
• Graffiau hunan eglurhaol?	17	8	183	92
• Tablau hunan eglurhaol?	34	17	166	83
• Ffotograffau?	20	10	180	90
				Sail: 200

Tabl 10: Datgelu manylion am yr elusen

	Do Nifer	%	Naddo Nifer	%
A ddatgelwyd y canlynol yn yr Adroddiad Blynyddol:				
• Enw'r elusen	199	100	1	1
• Rhif yr elusen	190	95	10	5
• Math o ddogfen lywodraethol	171	86	29	15
• Diwedd y flwyddyn ariannol	196	98	4	2
				Sail: 200

Technegau ymchwil a chanfyddiadau'r arolwg

Tabl 11: Datgeliadau yn unol â gofynion ac arfer da

	Manylion da a hygyrch	Rhywfaint o wybodaeth	Ychydig o fanylion	Dim manylion	Amherthnasol
Pa mor dda oedd y wybodaeth yn yr Adroddiad Blynyddol ynglŷn â'r canlynol:	Nifer	Nifer	Nifer	Nifer	Nifer
(a) Nodau ac amcanion (datgeliadau gofynnol)					
Datganiad o amcanion statudol yr elusen	161 (81%)	19 (10%)	8 (4%)	12 (6%)	-
Esboniad o amcanion a chenhadaeth yr elusen	152 (76%)	28 (14%)	15 (8%)	5 (3%)	-
(b) Trefniadaeth (datganiadau gofynnol)					
Rhestr ymddiriedolwyr ar ddiwedd y flwyddyn ac a wasanaethodd yn ystod y flwyddyn	188 (94%)	9 (5%)	0	3 (2%)	-
Manylion am y modd yr apwyntir ymddiriedolwyr	78 (39%)	43 (22%)	35 (18%)	44 (22%)	-
Manylion am unrhyw gorff neu berson â'r hawl i apwyntio ymddiriedolwyr	63 (32%)	44 (22%)	30 (15%)	63 (32%)	-
Disgrifiad o'r strwythur cyfundrefnol	74 (37%)	64 (32%)	47 (24%)	15 (8%)	-
(c) Trefniadaeth (datgeliadau am arfer da)					
Manylion am bwyllgorau, eu cyfansoddiad a'u meysyd gweithgaredd?	56 (28%)	51 (26%)	38 (19%)	53 (27%)	2 (1%)
(ch) Perthnasau (datgeliadau gofynnol)					
Datganiad o'r berthynas â phartïon perthynol	58 (29%)	38 (19%)	30 (15%)	35 (18%)	39 (20%)
Manylion am berthnasau ag elusennau a chyrrff eraill	49 (25%)	37 (19%)	45 (23%)	62 (31%)	7 (4%)
(d) Adolygiad o weithgareddau'r elusen a'i his-gwmnïau (datgeliadau gofynnol)					
Cyflawniadau ar gyfer y flwyddyn	126 (63%)	46 (23%)	15 (8%)	13 (7%)	-
Cynlluniau ar gyfer y dyfodol	66 (33%)	47 (24%)	58 (29%)	29 (15%)	-
Naratif am effeithiolrwydd codi arian	61 (31%)	33 (17%)	42 (21%)	43 (22%)	21 (11%)
Naratif yn ymwneud â chyfraniad gwirfoddolwyr	31 (16%)	34 (17%)	33 (17%)	82 (41%)	20 (10%)
Gwybodaeth a roddir am is-gwmnïau	40 (20%)	22 (11%)	23 (12%)	55 (28%)	60 (30%)
(dd) Cyllid (datgeliadau am arfer da)					
Sylwadau ar brif ffynonellau incwm a gwariant	71 (36%)	69 (35%)	35 (18%)	25 (13%)	-
Sylwadau ar sefyllfa ariannol yr elusen	61 (31%)	63 (32%)	54 (27%)	22 (11%)	-
Sylwadau ar eitemau anghyffredin (e.e. diffyg ariannol sylweddol mewn perthynas â chynllun pensiwn budd-dal diffiniedig)	46 (23%)	17 (9%)	15 (8%)	70 (35%)	52 (26%)
Sylwadau ar bolisiau cyfrifo ac unrhyw newidiadau i'r polisiau	27 (14%)	26 (13%)	26 (13%)	121 (61%)	-
(e) Perfformiad (am arfer da)					
A yw'r Adroddiad Blynyddol yn cynnwys cymarebau defnyddiol?	72 (36%)	58 (29%)	44 (22%)	26 (13%)	-
A roddir esboniad o berfformiad cymarebau allweddol?	62 (31%)	58 (29%)	44 (22%)	36 (18%)	-
(f) Cronfeydd wrth gefn (datgeliadau gofynnol)					
Esboniad o bolisi'r elusen ynglŷn â chronfeydd wrth gefn	131 (66%)	33 (17%)	17 (9%)	19 (10%)	-
Sylwadau ar gyflawniadau'r polisi a'r camau i'w cymryd	77 (39%)	49 (25%)	33 (17%)	41 (21%)	-
Esboniad o ddiffyg ariannol	17 (9%)	8 (4%)	8 (4%)	60 (30%)	107 (54%)
(ff) Buddsoddiadau (datgeliadau gofynnol)					
Crynodeb o bwerau buddsoddi penodol	41 (21%)	19 (10%)	34 (17%)	106 (53%)	-
Esboniad o bolisi buddsoddi'r elusen	70 (35%)	28 (14%)	25 (13%)	61 (31%)	16 (8%)
Sylwadau ar berfformiad buddsoddiadau	37 (19%)	24 (12%)	22 (11%)	95 (48%)	22 (11%)
(g) Grantiau (datgeliadau gofynnol)					
Esboniad o bolisiau ynglŷn â rhoi grantiau	33 (17%)	8 (4%)	10 (5%)	97 (49%)	52 (26%)
(ng) Rheoli risg (datgeliadau gofynnol)					
Datganiad am reoli risg	147 (74%)	24 (12%)	22 (11%)	7 (4%)	-
(h) Rheoli risg (datgeliadau am arfer da)					
Esboniad o'r prif risgiau	15 (8%)	12 (6%)	28 (14%)	145 (73%)	-
Esboniad o ddulliau monitro/rheoli	95 (48%)	42 (21%)	42 (21%)	21 (11%)	-
(i) Prosesau mewnol (datgeliadau am arfer da)					
Sylwadau ar staff a lefelau staffio?	60 (30%)	44 (22%)	44 (22%)	49 (25%)	3 (2%)
Sylwadau ar asedau (eiddo)	33 (17%)	25 (13%)	41 (21%)	96 (48%)	5 (3%)
Sylwadau ynglŷn â TG a systemau'r elusen?	10 (5%)	20 (10%)	18 (9%)	152 (76%)	-

Sail: 200

Tabl 12: Canlyniadau ac effeithiau a ddisgrifiwyd yn yr Adroddiad Blynyddol

	Manylion a esboniwyd	%	Gwybodaeth gyfyngedig	%	Dim manylion	%
I ba raddau y mae'r Adroddiad Blynyddol yn disgrifio'r canlynol:	Nifer		Nifer		Nifer	
Beth wnaeth yr elusen er mwyn cyflawni ei hamcanion?	130	65	55	28	15	8
Manylion am y modd y mae ei chyflawniadau yn cymharu â'I chynlluniau?	30	15	88	44	82	41
Esboniad o'r modd y bu gweithgareddau'r flwyddyn o fudd i ddefnyddwyr?	73	37	71	36	56	28
Esboniad o'r modd y bu gweithgareddau'r flwyddyn o fudd i'r gymdeithas yn gyffredinol?	31	16	67	34	102	51

Tabl 13: Cysylltiad rhwng yr Adroddiad Blynyddol a dulliau eraill o gyfathrebu

	Elusennau sy'n darparu'r datganiadau ychwanegol hyn/ yn defnyddio gwefannau	Adroddiadau Blynyddol yn croesgyfeirio at y datganiadau/ gwefannau eraill			
	Nifer (sail)	Nifer-Ydy	%	Nifer-Nac ydy	%
Os ydy'r llyfryn Adolygiad Blynyddol a Chyfrifon yn cynnwys datganiadau eraill (er enghraifft, adroddiad y Cadeirydd) a ydy'r Adroddiad Blynyddol yn cyfeirio atynt?	49	24	49	25	51
Os ydy'r elusen yn darparu Adolygiad Blynyddol, a ydy'r Adroddiad Blynyddol yn croesgyfeirio ato?	83	20	24	63	76
Os oes gan yr elusen wefan, a ydy'r Adolygiad Blynyddol yn cyfeirio ato?	188	39	21	149	79

Technegau ymchwil a chanfyddiadau'r arolwg

Tabl 14: Sylwadau eraill ar yr Adolygiadau Blynyddol

	Nifer yr elusennau
Llyfryn Adroddiad Blynyddol a Chyfrifon yn cynnwys llawer o fanylion, ond mewn adroddiadau eraill yn hytrach na'r Adroddiad Blynyddol ei hun	60
Adroddiad trefnus, cryno a defnyddiol	49
Adroddiad byr, nad yw'n dweud llawer	34
Adroddiad yn cynnwys manylion rhagorol am amcanion, cynlluniau, polisiâu a strategaeth	33
Adroddiad yn cynnwys gwybodaeth dda iawn am effaith a chyflawniadau	30
Adroddiad yn cynnwys gwybodaeth dda am faterion ariannol	26
Adroddiad yn brin o wybodaeth am faterion ariannol	22
Adroddiad yn brin o wybodaeth am effaith gweithgareddau elusennol	17
Rhywfaint o fanylion gonest am broblemau	15
Manylion arbennig o dda am strwythur a threfniadaeth yr elusen	13
Prinder manylion am strwythur a threfniadaeth yr elusen	6

Y Datganiadau Ariannol

Tabl 15: Gwybodaeth allweddol yn y datganiadau ariannol

	Oes	Nac oes	Amherthnasol
Gwybodaeth allweddol am dryloywder ac atebolrwydd	Nifer	Nifer	Nifer
A oes polisi cyfrifo ar gyfer pob prif ffynhonnell incwm (cyfunol/cyfnerthol), gwariant ac eitem ar y fantolen?	143 (72%)	57 (29%)	-
A oes nodyn yn esbonio cyfansoddiad pob un o'r prif ffigurau yn y SoFA (cyfunol/cyfnerthol) a'r fantolen?	125 (63%)	75 (38%)	-
A oes nodyn yn dangos swm unrhyw daliadau a wnaed i'r ymddiriedolwyr, a natur a swm unrhyw dreuliau a ad-dalwyd iddynt yn ystod y flwyddyn?	187 (94%)	13 (7%)	-
A oes datgeliad digonol o bartïon perthynol, a'r trafodion ariannol a mantolau mewn perthynas â nhw, yn enwedig treuliau a fyddai'n cael eu talu fel rheol gan sefydliad ond na chyfeirir atynt yn y SoFA?	130 (65%)	17 (9%)	53 (27%)
			Sail: 200

Tabl 16: Y polisiau cyfrifo sy'n annigonol neu'n eisiau amlaf

	Nifer yr elusennau
Adnoddau yn dod i mewn:	
• Incwm o weithgareddau elusennol	10
• Rhoddion a gwerthiant nwyddau a roddwyd	5
• Cymynroddion	3
• Ffioedd/grantiau derbyniadwy	10
• Incwm o siop a masnach	3
Adnoddau yn mynd allan:	
• Gwariant elusennol	27
• Grantiau taladwy	3
• Costau gweithredu/gwariant masnachol	10
• Dyrannu costau i gategorïau'r SoFA	69
• Polisi ynglŷn â dyrannu costau i gategorïau'r SoFA yn annigonol	5

Tabl 17: Nodiadau i'r datganiadau ariannol sy'n annigonol neu'n eisiau amlaf

	Nifer yr elusennau
Adnoddau yn dod i mewn:	
• Incwm o weithgareddau elusennol	17
• Rhoddion a chymynroddion	16
• Ffioedd/grantiau derbyniadwy	28
• Incwm o siop a masnach	11
Adnoddau yn mynd allan:	
• Gwariant elusennol	14
• Grantiau taladwy	4
• Treuliau siop/gwariant masnachol	8
• Costau codi arian	3
• Dim dadansoddiad yn ôl math o wariant, neu ddadansoddiad annigonol	20
• Dim datgeliad o faint treuliau ymddiriedolwyr	4
Arall:	
• Esboniad annigonol o bwrpas cyllid	4

Tabl 18: Sylwadau eraill ar y Cyfrifon

	Nifer yr elusennau
Incwm heb ei gategoreiddio'n briodol yn y SoFA	10
Gwariant heb ei gategoreiddio'n briodol yn y SoFA	2
Camgymeriadau mathemategol yn y cyfrifon	3
Mantolen ac adroddiad yr archwiliwr heb eu llofnodi	9

Adolygiadau Blynyddol

Tabl 19: Pa mor ddiddorol yw'r Adolygiadau Blynyddol o safbwynt gweledol?

	Ydy	Nac ydy
	Nifer	Nifer
A ydy'r Adolygiad Blynyddol cyfredol wedi'i ysgrifennu mewn dull sy'n rhwyddach ei ddarllen na'r Adroddiad Blynyddol?	69 (83%)	14 (17%)
A ydy'r Adroddiad Blynyddol yn cynnwys y canlynol:		
• Graffiau a thablau hunan eglurhaol?	65 (78%)	18 (22%)
• Dyfyniadau gan fuddiolwyr?	55 (66%)	28 (34%)
• Ffotograffau?	90 (96%)	3 (4%)
		Sail: 83

Tabl 20: Gwybodaeth sylfaenol yn yr Adolygiadau Blynyddol

	Ydy	Nac ydy
	Nifer	Nifer
A ydy'r Adolygiad Blynyddol cyfredol wedi'i ysgrifennu mewn dull sy'n rhwyddach ei ddarllen na'r Adroddiad Blynyddol?	69 (83%)	14 (17%)
A ydy'r Adroddiad Blynyddol yn cynnwys y canlynol:		
• Graffiau a thablau hunan eglurhaol?	65 (78%)	18 (22%)
• Dyfyniadau gan fuddiolwyr?	55 (66%)	28 (34%)
• Ffotograffau?	90 (96%)	3 (4%)
		Sail: 83

Technegau ymchwil a chanfyddiadau'r arolwg

Tabl 21: Faint o wybodaeth oedd yn yr Adolygiad Blynyddol?

	Gwybodaeth ychwanegol at yr hyn a geir yn yr Adroddiad Blynyddol	Gwybodaeth yn dyblygu'r hyn a geir yn yr Adroddiad Blynyddol	Dim gwybodaeth
A ydy'r Adolygiad Blynyddol yn cynnwys gwybodaeth am:	Nifer	Nifer	Nifer
Gymarebau ariannol	29 (35%)	32 (39%)	22 (27%)
Ffigurau mewn pennawd	50 (60%)	26 (31%)	7 (8%)
Gwybodaeth er mwyn creu effaith	78 (94%)	4 (5%)	1 (1%)
Gwybodaeth am ganlyniadau	77 (93%)	5 (6%)	1 (1%)
Cynlluniau ar gyfer y dyfodol	59 (71%)	9 (11%)	15 (18%)
			Sail: 83

Tabl 22: Beth oedd pwrpas ymddangosiadol yr Adolygiad Blynyddol?

(Sylwer: I bob golwg roedd gan rai o'r Adolygiadau Blynyddol fwy nag un pwrpas)

	Ie	Na
Pwrpas ymddangosiadol yr Adolygiad Blynyddol	Nifer	Nifer
Codi arian	35	48
Cyhoeddusrwydd cyffredinol	64	19
Ychwanegiad at yr Adroddiad Blynyddol	37	46
		Sail: 83

Tabl 23: Canfyddiadau a sylwadau cyffredinol

	Nifer yr elusennau
Adolygiad Blynyddol yn llawer rhwyddach ei ddarllen na'r Adolygiad Blynyddol	8
Mwy o wybodaeth yn yr Adolygiad Blynyddol na'r Adroddiad Blynyddol	12
Adolygiad Blynyddol yn llenwi bylchau'r Adroddiad Blynyddol	15
Adolygiad Blynyddol yn hir iawn/anodd ei ddarllen	4
Defnydd da o achosion unigol er mwyn esbonio gweithgareddau/allbwn	7
Yn peri dryswch am fod yr Adolygiad Blynyddol yn dwyn yr enw "Adroddiad Blynyddol" er bod Adroddiad Blynyddol Ymddiriedolwyr yn bodoli ar wahân	4
Adolygiad Blynyddol yn hir iawn ac yn anodd iawn ei ddarllen	4
Adolygiad Blynyddol ar y gwefan yn cyfeirio at flwyddyn wahanol i'r Adroddiad Blynyddol a Chyfrifon	10

Technegau ymchwil a chanfyddiadau'r arolwg

Dulliau eraill o hyrwyddo tryloywder ac atebolrwydd

Tabl 24: Dulliau eraill a ddefnyddiwyd i hyrwyddo tryloywder ac atebolrwydd

Cyfeiriad a wnaed gan yr elusen at y canlynol yn ei Hadroddiad Blynyddol neu ei Hadolygiad Blynyddol:	Nifer o elusennau
Gwefan	57 (29%)
Taflen newyddion	23 (12%)
Llinell gymorth, canolfan gwasanaethau cwsmeriaid, mini-cam, e-bost, gwasanaeth ffôn, negeseuon testun	12 (6%)
Argaeledd cyhoeddiadau, ffeithlenni, papurau ymchwil	8 (4%)
Dogfennau megis Cynllun Corfforaethol, a'r Adolygiad ar CD, ar gael pan wneir cais	8 (4%)
Cyfarfodydd cyson â gwirfoddolwyr, grwpiau ymgynghorol, tenantiaid ayyb	3 (2%)
	Sail: 200

Canlyniadau arolwg o'r cyhoedd

Tabl 25: Gofynnwyd i atebwyr ddweud pa mor bwysig, yn eu barn hwy, oedd y ffaith bod elusennau yn darparu'r wybodaeth ganlynol. Defnyddiodd atebwyr raddfa o 1 - 5 lle'r oedd 5 yn dynodi pwysig iawn, 1 yn dynodi nad oedd yn bwysig o gwbl a 3 yn dynodi nad oedd yn bwysig nac yn ddibwys. Dangosir canlyniadau cymedrig 1000 o ymatebion isod.

Sgôr gymedrig	Gwybodaeth
4.43	Y gweithgareddau elusennol y gwariodd yr elusen ei harian arnynt
4.41	Yr hyn mae'r elusen wedi'i gyflawni (h.y. effaith y gwaith a wnaed ganddi ar y gymdeithas)
4.14	Swm yr arian y mae'r elusen yn ei wario ar godi arian (gan gynnwys cost staff a gyflogir i godi arian)
4.10	Cost gweinyddu'r elusen (gan gynnwys costau staffio)
3.95	Polisiau ariannol yr elusen (e.e. polisiau buddsoddi a chronfeydd wrth gefn)
3.87	Y modd y gwneir penderfyniadau o fewn yr elusen a'r sawl sy'n eu gwneud
3.80	Ffynhonnell incwm yr elusen (e.e. rhoddwyr/grantiau/buddsoddiadau/ffioedd ayyb)
3.40	Rhif cofrestru'r elusen

SYLWER: Mewn rhai achosion mae cyfanswm y canrannau'n fwy na 100% o ganlyniad i dalgrynnu.

Atodiad B - Rhestr termau

Tryloywder ac Atebolrwydd: At bwrpas yr adroddiad hwn, mae tryloywder ac atebolrwydd yn ôl ein dehongliad ni yn golygu rhoi gwybodaeth berthnasol a dibynadwy i fudd-ddeiliaid yn brydlon, sef gwybodaeth sy'n ddiuedd, yn gymaradwy, yn ddealladwy a chyda ffocws pendant ar anghenion budd-ddeiliaid. Mae hyn yn golygu bod modd i'r wybodaeth a ddarperir gael ei deall gan ddefnyddwyr gyda rhywfaint o ddealltwriaeth o fusnes, gweithgareddau economaidd a chyfrifo ac sy'n barod i astudio'r wybodaeth gyda mesur o ddiwydrwydd.

Adolygiad Blynyddol: Adolygiad o weithgareddau'r flwyddyn a gynhyrchir gan elusen yn ychwanegol at ei Hadroddiad Blynyddol. Yn aml maent yn fwy hyrwyddol eu natur ac weithiau maent yn fwy disgrifiadol, gan ganolbwyntio llai ar adrodd am berfformiad a chysylltu â gwybodaeth ariannol. Gall eraill gynnig gwybodaeth fwy manwl am berfformiadau yn ymwneud â gwasanaethau penodol a gallant gynnwys crynodebau ariannol.

At bwrpas y project hwn, mae 'Adolygiad Blynyddol' yn golygu unrhyw ddogfen a:

- luniwyd er mwyn edrych yn gyffredinol ar weithgareddau'r elusen, fel rheol crynodeb o wybodaeth ariannol, cyflawniadau a newidiadau ayyb (h.y. nid yw'n adrodd am un maes yn unig, megis ymchwil neu effeithiolrwydd codi arian);
- gyhoeddwyd yn ychwanegol at y dogfennau a gynhyrchwyd i gwrdd â rhwymedigaethau statudol yr elusen (er y gall fod yr adolygiad yn cynnwys detholiadau o'r wybodaeth honno); ac
- y mae'n rhwydd i'r cyhoedd gael gafael arni.

Adroddiad Blynyddol: Adroddiad a gynhyrchir yn flynyddol gan ymddiriedolwyr yr elusen, yn unol â gofynion cyfreithiol a gofynion y SORP Elusennau, i ddarparu manylion cyfreithiol a gweinyddol ynglŷn â'r elusen ac i ddisgrifio'r hyn y mae'n ceisio ei wneud a'r modd y mae'n gwneud hynny.

Allbynnau: y gweithgareddau, gwasanaethau a'r nwyddau a ddarperir ar gyfer defnyddwyr. Mae'r rhain yn dangos maint y gwaith a wnaed, gan gynrychioli cynnyrch uniongyrchol yr elusen yn sgil ei gweithgareddau.

Amcanion: yn disgrifio'r newidiadau mae'r elusen yn gobeithio'u cyflawni, neu'r gwahaniaeth y mae'n gobeithio ei wneud.

Amcanion: y camau ymarferol y bydd yr elusen yn eu cymryd er mwyn cyflawni'i hamcanion.

Budd-ddeiliad: unrhyw berson, grŵp, neu sefydliad a chanddynt ddiddordeb yn, neu sy'n disgwyl rhywbeth gan yr elusen.

Buddiolwyr: personau, pobl neu gyrff a allai gael budd o ymddiriedolaethau elusennol.

Canlyniadau: y newidiadau, buddion, dysg neu effeithiau eraill sy'n digwydd o ganlyniad i wasanaethau neu weithgareddau'r elusen.

Cyflawniadau: rhywbeth a gyflawnwyd gan yr elusen.

Rhestr termau

Cyfrifon: y datganiad o gyfrifon a gynhyrchir yn flynyddol gan elusen yn unol â gofynion Deddf Elusennau 1993 neu Ddeddf Cwmnïau 1985 a'r SORP Elusennau. Fel rheol maent yn cynnwys Datganiad o Weithgareddau Ariannol, Mantolen, datganiad o Lif Arian (lle bo gofyn), datganiad o bolisiau cyfrifo a nodiadau eraill. Os ydynt wedi cael eu harchwilio, bydd adroddiad archwiliwr ynghlwm wrthynt.

Cynllun: disgrifiad ysgrifenedig o'r camau y bydd elusen yn eu cymryd i gyflawni pethau penodol.

Cynllun strategol: yn cwmpasu'r weledigaeth ar gyfer dyfodol yr elusen ac yn amlinellu'r camau y mae angen eu cymryd er mwyn cyflawni hyn dros gyfnod o amser, yn aml tair i bum mlynedd.

Dangosyddion: gwybodaeth glir-ddiffiniedig, rhwydd ei mesur, sy'n dangos pa mor dda yw perfformiad yr elusen.

Datganiad o genhadaeth: datganiad byr o bwrpas yr elusen, a elwir weithiau'n amcan cyffredinol.

Defnyddwyr: unrhyw un sy'n defnyddio neu'n cael budd o wasanaethau neu gyfleusterau elusen, boed y rheiny gan wirfoddolwyr neu wasanaeth contract.

Effaith: effeithiau cyffredinol, hirdymor gwaith yr elusen.

Gwasanaethau: y nwyddau, gwybodaeth a gweithgareddau y mae'r elusen yn eu darparu ar gyfer ei defnyddwyr.

Gweithgareddau: unrhyw beth a wnaed gan ddefnyddio adnoddau yn perthyn i'r elusen neu o dan ei rheolaeth, a chan gynnwys ei holl waith a'i gwasanaethau.

Mewnbynnau: yr adnoddau a'r gweithgareddau a ddefnyddir gan yr elusen i ddarparu'r gwasanaethau a gynigir, er enghraifft, amser staff a gwirfoddolwyr, defnydd o gyfarpar ayyb.

Polisiau cyfrifo: yr egwyddorion, seiliau, confensiynau a'r rheolau y gellir eu defnyddio at bwrpas adnabod, mesur a chyflwyno gweithrediadau masnachol yn y cyfrifon.

Rheoli perfformiad: y defnydd o wybodaeth mesur perfformiad er mwyn helpu i osod nodau perfformiad ac adrodd amdanynt.

Strategaeth: dull wedi'i gynllunio ar gyfer cyflawni amcanion tymor hir.

Tueddiadau: yn dangos newidiadau dros amser; gellir eu defnyddio i gynllunio gwasanaethau yn y dyfodol.

Atodiad C - Gofynion ar gyfer paratoi a chyflwyno Adroddiadau Blynyddol a Chyfrifon

Paratoi

Mae'n ofynnol bod pob elusen gofrestredig yn Lloegr a Chymru yn cynhyrchu adroddiadau ariannol blynyddol ac Adroddiad Blynyddol ac yn eu cyflwyno i'r Comisiwn Elusennau, ac eithrio yn achos yr elusennau hynny sy'n rhy fach i gyfateb i'r meini prawf sy'n dynodi lleiafswm maint elusen, a geir yn Neddf Elusennau 1993 - elusennau a chanddynt incwm gros a chyfanswm gwariant o £10,000 neu lai. Yn ogystal, rhaid i unrhyw elusen sy'n gwmni cyfyngedig ddarparu a chyflwyno adroddiad cyfarwyddwr a datganiadau blynyddol i Dŷ'r Cwmnïau. Fel rheol, rhaid i elusen sydd o fewn cwmpas rheolydd arall (er enghraifft Landlord Cymdeithasol Cofrestredig, a reoleiddir gan y Gorfforaeth Letya) gydymffurfio â gofynion y rheolydd hwnnw i baratoi a chyflwyno Adroddiad Blynyddol a Chyfrifon. Pa bynnag gategori y mae elusen yn perthyn iddo, felly, oni bai ei bod yn fach iawn, rhaid iddi gydymffurfio â gofyniad cyffredinol drwy baratoi a chyflwyno adroddiad cyfarwyddwr / ymddiriedolwyr a datganiadau ariannol yn flynyddol.

Terfynau amser ar gyfer cyflwyno

Yn ogystal, mae terfynau amser rheolyddion ar gyfer cyflwyno Adroddiad Blynyddol a Chyfrifon yn debyg iawn i'w gilydd. Rhaid i elusennau cofrestredig gyflwyno eu Hadroddiad Blynyddol a datganiadau ariannol i'r Comisiwn Elusennau o fewn deg mis o ddiwedd eu blwyddyn ariannol. Mae terfyn amser tebyg yn bodoli ar gyfer cyflwyno'r dogfennau hyn i Dŷ'r Cwmnïau, yn achos elusennau sy'n gwmnïau. 31 Mawrth 2003 oedd diwedd blwyddyn ariannol pob un o'r 200 o elusennau a arolygwyd fel rhan o'r project hwn, ac felly'r dyddiad olaf ar gyfer cyflwyno'r dogfennau oedd 31 Ionawr 2004.

Ffurf a Chynnwys

Pennir lleiafswm cynnwys Adroddiadau Blynyddol Ymddiriedolwyr ar gyfer elusennau yn Lloegr a Chymru gan Reoliadau Deddf Elusennau 1993. Mae'r SORP Elusennau ('Datganiad o Arferion Cymeradwy ar gyfer Adrodd a Chadw Cyfrifon Elusennau') yn gwneud rhai argymhellion ychwanegol. Yn ogystal, rhaid i Gwmnïau Elusennol gynhyrchu adroddiad cyfarwyddwr, er bod modd cyfuno hwn ag Adroddiad Blynyddol yr Ymddiriedolwyr er mwyn ceisio lleihau maint yr wybodaeth a ddyblygir.

Pennir ffurf a chynnwys datganiadau ariannol elusen yn ôl y ddeddfwriaeth y sefydlwyd yr elusen yn unol â hi. Rhaid i elusennau sy'n gwmnïau gydymffurfio â gofynion cyfrifo Deddf Cwmnïau 1985, ac i raddau pell, rhaid i elusennau nad ydynt yn gwmnïau gydymffurfio â gofynion Deddf Elusennau 1993 a Rheoliadau Adroddiadau a Chyfrifon cysylltiol.

Rhaid i'r elusennau sy'n gwmnïau a'r rhai nad ydynt yn gwmnïau fel ei gilydd baratoi cyfrifon croniadol sy'n rhoi darlun gwir a theg. Er mwyn gwneud hyn rhaid i'r cyfrifon gydymffurfio â safonau cyfrifo perthnasol ac unrhyw ddatganiad o arferion cymeradwy (SORP) sy'n berthnasol i'r elusen. Mae SORP yn ddogfen sy'n cynnig y dehongliad priodol o safonau cyfrifo ar gyfer y math o sefydliad sy'n ei geisio. Mae gofyn i'r mwyafrif o elusennau gydymffurfio â'r SORP Elusennau, er bod SORPau'n bodoli ar gyfer Landlordiaid Cymdeithasol Cofrestredig, Cyllid Awdurdodedig (ymddiriedolaethau unedol) a Sefydliadau Addysg Bellach ac Uwch.

Yn unol â hynny, mae'r Comisiwn Elusennau yn disgwyl y bydd elusennau'n cadw at y SORP sy'n berthnasol i'w hamgylchiadau.

Cwmpas

Mae'r gofynion uchod yn berthnasol i Adroddiadau Blynyddol a datganiadau ariannol elusennau, ac i bob pwrpas yn darparu lleiafswm safon ofynnol. Ond prin fod unrhyw ofyniadau o gwbl mewn perthynas ag unrhyw ddeunydd ychwanegol a gynhrychir gan elusen er mwyn adrodd am ei pherfformiad, megis Adolygiad Blynyddol "sgleiniog" neu ddeunydd ar y gwefan, oni bai ei fod yn cynnwys datganiadau ariannol crynodedig. Pan ddigwydd hynny, mae 'r SORP yn cynnig arweiniad ynglŷn â ffurf a chynnwys y datganiadau ariannol crynodedig, ac mae'r Bwrdd Arferion Archwilio wedi cyhoeddu Bwletinau o'r enw "The auditors' statement on the summary financial statements (Bwletin 1999/6) a "The electronic publication of auditors' reports" (Bwletin 2001/1).

Mae cyhoeddiad CC59 gan y Comisiwn ("Reporting the Activities and Achievements of Charities in Trustees' Annual Reports") yn datgan:

"Er y gall ymddiriedolwyr roi gwybodaeth ddefnyddiol drwy gyfeirio at y ffynonellau gwybodaeth hyn yn eu Hadroddiad Blynyddol, ni ddylid gadael i wybodaeth o'r fath gymryd lle adrodd da. Os yw am lwyddo, rhaid i'r Adroddiad Blynyddol fod yn ddogfen ddealladwy sydd nid yn unig yn cwrdd â gofynion y SORP a'r Rheoliadau, ond sydd hefyd yn creu'r cysylltiad angenrheidiol ag adrodd ariannol."

Atodiad Ch - Llyfryddiaeth

CaritasData, *The Top 3000 Charities 2003*.

Y Comisiwn Elusennau, *Accounting and Reporting by Charities, Statement of Recommended Practice*. HMSO 2000.

Y Comisiwn Elusennau, *Accounting and Reporting by Charities, Statement of Recommended Practice Update Bulletin 1*. HMSO 2003.

Y Comisiwn Elusennau, *Accounts aren't optional*, Newyddion y Comisiwn Elusennau, Rhifyn 19, Hydref, 2003.

Y Comisiwn Elusennau, *Charity Reserves*. (RS3), 2003.

Y Comisiwn Elusennau, *Reporting the activities and achievements of charities in Trustees' Annual Reports*. (CC59), 2003.

Y Comisiwn Elusennau, *Tell it like it is*, Newyddion y Comisiwn Elusennau, Rhifyn 18, Haf, 2003.

Y Comisiwn Elusennau, *Charities and Risk Management*, 2003.

Grŵp Cyfarwyddwyr Arian Elusennau, *Inputs Matter - Improving the quality of reporting in the charity sector*, 2003.

Y Swyddfa Gartref, *The Charities (Accounts and Reports) Core Guide*, HMSO, 2000.

Y Swyddfa Gartref, *The Charities (Accounts and Reports) Regulations 1995*, HMSO, 1995.

Y Swyddfa Gartref, *Charities Act 1993 c. -10*. HMSO, 1993.

Y Swyddfa Gartref, *Charities and Not-for Profits, a modern legal framework. The Government's response to "Private Action, Public benefit"*, HMSO 2003.

PricewaterhouseCoopers, *Value Reporting review 2003 - Transparency in corporate reporting*, 2003.

Scott, N. *Valuing Volunteers - the hidden asset*, CIPA Spectrum, rhifyn 4, Mawrth, 2004.

Uned Strategaeth, *Private Action, Public Benefit - a review of Charities and the wider not-for profit sector*, Swyddfa'r Cabinet, 2002.

Cydnabyddiaethau

Hoffem ddiolch i bawb a gyfrannodd at gynhyrchu'r adroddiad hwn.

Rhaid diolch yn arbennig i aelodau Grŵp Elusennol PricewaterhouseCoopers LLP am eu cymorth ac i Paul Bussy (FCA) am ei gymorth a'i fewnwelediadau gwerthfawr wrth greu fframwaith ar gyfer yr astudiaeth a dadansoddi'r canlyniadau.